

Nzryr-krbz Pol Mz Lr Rom Natq Ngr Nzaplxtqngr Mz Nzryr-krbz Pol Mz Lr Rom

Aposol Pol yrbzle letz lc mz lrmakxtr mrkc mzteadau Rom, mzli kc tqmnc-ngrde mz taon kxetu Korint. ☆ Mz drtwr kxnzakrlzng mz Nzryrngkxtr, yrle mz mzlr yiz 57—58 AD mz nibr nzrmcngr mz Jiszs. Mzli lc ycpwz pipz nzayrkrpx-krde nzvzpx-krde kratq.

Lr Jiu x kxtrngiulrJiu kxnzrlxngiting nzmncng Rom. Pol troklatipeleu nidr, a' xlrle nqm q krdr. Aykrpxpele nzryapwxtipx-krde Nrpakxmrlz mrkc Provins kcng Masedonia x Esia, x suti kz drtwrde nzvz-krde Spen mz nzryapwx-krde elr. Mz drtwrde, Rom nangi nou nzvz-moukrde x lr Rom kxnzrlxngiting naokatrle nide mz nzvzpx-krde. Mz nzm-krde lcde, mrlzbx bade nzyokaetipx-zpwx-krbzle badr Nrpakxmrlz kc tqyapwxtipxle, murde nakrlz-angidrlr da kcng tqalvztr-ngrde, murde tralvztrleu lr Rom mzli kc.

Mz letz lc, Pol pipx-zpwxle kxnamu leplz nztubq-krdr mz nzobqkr Gct. X kxmu nzarlapx-krde nidr. Mc Rom 1:16-17 x 3:21-25.

Mrkcng Mz Letz Lc

Pol pibzle badr nike yrle mz letz lc. *[1:1-17]*
Mz nzobqkr Gct leplz amrlx takitrde nzprtrkrdr mz Hxl. *[1:18—3:20]*
Jiszs nide lrpzki r Gct mz nzarlapx-krde leplz. *[3:21-31]*

☆ : Rom 15:26; 16:1-2

Be ngr Ebraam aelwapx-ngrde kx Gct atubqtile
 leplz kcng tzbtri drtwrdr nide. *[dckrlzde 4]*
 Nztubq-krgru mz nzobqkr Gct okatrle nigu.
[5:1-11]
 Leplz amrlx nzaleng alwx, a' Jiszsz aovxiole
 alwx x nzbzng. *[5:12-21]*
 Zmrlz ngr Gct kxmyalz trmailzleu leplz mz
 nzale-krdr alwx. *[dckrlzde 6]*
 Loukxtr tr-rngiscu zmatq ngr nzaprtr-krde
 kxnzrlxngiting mz Hxl, murde nzbzpeng
 badr Kraes mz nzaxvctr-krbzlr bade. *[7:1-13]*
 Zmatq ngr alwx nzotablring badr drtwr kxmrlz
 mz nabz kxnzrlxngiting. *[7:14-25]*
 Mqngrkxtr wz zvz mz nabz kxnzrlxngiting x
 nivz lr Gct etu. *[dckrlzde 8]*
 Kxmule-esz' Gct okatrle kxnzrlxngitilr Jiszsz mz
 zmrlz ngrde kxmyalz, a' vz zvz nzatutr-kz-
 krde da kcng tqesalz-ngrbzle mz lr Israel.
[9—11]
 Leplz neng Gct navz-nqblq-zvzlr natqde lcng.
[12—15]
 Pol rpibzle kx, “Nimu la,” mz kzdung lr Rom.
[dckrlzde 16]

¹ Ninge Pol, wztrpo mz Mevalu Jiszsz, x ryrbo
 bamu, nimu kxnzrlxngiting mz mzteadau Rom.
 Gct kqlele ninge mz nzngini-krnge aposol, x
 mcpxle ninge mz nzryapwxtipx-krbo Nrpakxm-
 rlz.

² Mzli kc bqnc Nrpakxmrlz lc pipx-pnzbz Gct
 mz profet nedeng mz nzesalz-krbzle kx sa na-
 atutrle kalr. X nzyrolr mz Nzryrngkxtr.

3-4 Nrpakxmrlz lc ycmnetr-ngrde Mrlxde, Kx-etu rgu Jiszs KxnzmcpX. Mz nznngini-krde leplz, nzmikapX mz nqvi lr King Devet. Kxmule-esz' nide leplz, a' Gct aelwapX-zpwx-ngrde mz zmatq ngrde kX xplr kX Jiszs ni-kzde Mrlxde kc tqtr-esz'ngr. X alele da lc mz nzatulz-krmle nide mz nzbzngr.

5 Gct ka-ngrmle bange nzwzkr aposol, mz nzvz-nqblq-krde da kc tqalem Kraes bange mz zmrlz ngrde kXmyalz, murde namailzX leplz amrlX kXtrngiulrJiu mz nzbrtikr drtwrdr nide x mz nzvz-nqblq-krdr natqde. Murde sa nabatrpzle mz leplz kXkqlu nzamatq-krdr Kraes.

6 X prtrpe-kzpzmu mz leplz kcng tqkqle Gct mz nznngini-krdr leplz neng Jiszs KxnzmcpX.

7 Mz nzmU-krde lcde, tqryr-ngrbo bamu, nimu amrlX kcng tzmncng Rom, tqmrlzti Gct nimu x tqkqlele nimu mz nznngini-krmu leplz kXnztr nedeng. X krka'-ngrne kX Gct Trtegu badr Kxetu rgu Jiszs KxnzmcpX naokatrlr nimu x na-amnc-zpwxlr nimu.

Pol Suti Drtwrde NzyapwxtipX-krbzle Nrpakxmrlz Mz Lr Rom

8 Mz nzyzutrkr letz lc, napi-kaipo bamu kX awi-ngrbo mz Gct nimu amrlX, murde nrpa ngr nzbrtikr drtwrmu Jiszs KxnzmcpX krlzpele mrkang kqlu mz nrlc tulvzo.

9 Wztrpo mz Gct mz mqngrnge atwrnrngr, mz nZpipX-krnge Nrpa ngr Mrlxde. X Gct krlzle kX trmrbrtru mz drtwrnge nimu mz nzkrka'-krnge.

10 RlxTi-zvzbo bade narlr-ngrmle bange nzoklati-krbo nimu.

11 Murde sutitx zlwz drtwrnge nzvz-krbo bamu, murde na-amrlzx nimu mz nzokatrkr Mqngrkxtr x nzrlxngiti-krmu naxplrnepx.

12 Drtwr ngr nzymne-krbo lc kx sa naokatr-lzbqku, murde nzrlxngiti-krmu sa na-apqtrple drtwrnge x nzrlxngiti-krnge sa na-apqtrpze drtwrmu.

13 Mzlengeng x inwengeng, suti drtwrnge kx nakrlzamu kx nzwrde kqlupe aotingr drtwrnge nzvz-krbo bamu. A' vzm krlzmle mzli ka sc tqrblytxbe. Suti drtwrnge nzvz-krbo murde naokatrpo nimu lr Rom mz nzrlxngitingr, da kc tqwaisrpe-ngrne mztea nyz kzdung kz leplz.

14 Murde Gct kapxle natq kx nayapwxtipxbo Nrpakxmrlz mz leplz amrlx mz nrlc tulvzo, myapxbz kxtrngiulr'jiu, kxmule-esz' nqm q krdr blepxbz o trtingr, x kxmule-esz' kxnzsiklung o kxtrnzsikluung.

15 Delc tqsutitx-zlwzngr drtwrnge nzpipx-kz-krbo Nrpakxmrlz bamu, nimu lr Rom.

Zmatq Ngr Nrpakxmrlz

16 Glqpx-lzbq-ngrne Nrpakxmrlz, murde angidatile me pnz drtwrnge. Nrpakxmrlz lc tqngi nou zmatq ngr Gct mz nzarlapx-krde leplz amrlx kcng tzbtri zvz drtwrdr Jiszs mz nzlxngiti-krdr Nrpa lc. Lrpzki r nzarlapxngr lc navzki leplz amrlx, abzo mz lr Jiu x kxtrngiulr'jiu kc ate.

17 Murde Nrpakxmrlz lc aelwapx-ngrde lrpzki kc tqyrlqzbz Gct mz leplz mz nzatubqti-krbze nidr mz nzobq-krde. Nztubqngr lc yzutr mz nzbrkr drtwr x yrkrpx mz nzbrkr drtwr. Da

kc tqwai nzrpikr Nzryrngrkxtr kx, “Nzlu^{kr} kx^{nz}-^{tubqng} ^{tutr} ^{mz} ^{nzbrtikr} ^{drtwrdr} ^{Gct.}” ☆ *

Takit^{rde} Gct Nzayrplapx-krde Lep^{lz} Kx^{nz}aleng Al^{wx}

¹⁸ Gct kc tqm^{ncom} Heven, ngyati drt^{wrde} leplz x ayr^{plapxle} nidr amrlx mz alwx ngr^{drng}. Murde n^{zpx}t^{xpx}-n^{grdr} n^{zalvz}tr^{ngr} angid^{rng}, a' vz zvz n^{zvz}-n^{qblq}-krdr n^{qm}q n^{gr} alwx.

¹⁹ Nzale^{lr} da lc, k^{xm}ule-^{esz'} a^{dcpx}-l^{zbq}b^z bad^r mz nab^{zdr} x da angid^r op^x-z^{pwx}b^z bad^r.

²⁰ Yzuo mzli kc Gct tq^{wz}-n^{grde} n^{rlc}, da l^{ng} amrlx tq^{wz}-n^{grde} n^{zael}w^{apx}-n^{grb}z^{lr} nide mz leplz, k^{xm}ule-^{esz'} tr^{nzm}cl^{ru} nide. Nak^{rlz}lr kx nide Gct angid^r kc tq^{wz}-n^{grde} n^{rlc} x r^{ngisc} z^{matq} kx y^{ctx} alo. Mz n^{zmu}-k^{rde} l^{cde}, tr^{pzn}g^r me ngi noude mz n^{zrpi}-krdr kx tr^{nz}k^{rlz}lr nide.

²¹ K^{xm}ule-^{esz'} n^{zkrlz}lr kx nide Gct, a' n^{zpx}t^{xpx}-n^{grdr} n^{zangio}-krdr nide x n^{zawi}-k^{rbz}lr bade. Tr^{nzl}x^{ngit}lr da angid^r, a' v^z-r^{br} mz n^{zyrlq}-krdr drt^{wrdr} esz'-krdr mz n^{qm}q k^r Gct. Mz n^{zmu}-k^{rde} l^{cde}, drt^{wrdr} m^{rbr}tr^{pz} x n^{zrl}x^{ngit}-r^{brng}.

²² K^{xm}ule-^{esz'} n^{zrpilr} n^{zyr}plap^{xng}, a' n^{zng}q^{ngutx}-z^{lwz}ng.

²³ Murde n^{ztek}q^{tr}lr n^{zangio}-krdr Gct angid^r kc t^{qlu} alo, t^{qtr}, x t^{qmyal}z, mz n^{zangio}-a^{lzu}-krdr

☆ **1:17** Habakuk 2:4 * **1:17** Drtwr ngrde li, murde ycm-
netr-ngrde nzlungr mz nrlc ka x nzlungr kxboi Heven. Lep^{lz}
neng Gct sa nam^{nc}-z^{pwx}ng mz nrlc ka mzli k^{znike} n^{zlu}-krdr
v^z-n^{qblq}-n^{grde} n^{zbrtikr} drt^{wrdr} nide. X nzlungr kxboi Heven
v^{zpxm} mz n^{zabrtr}-k^{rbz}lr drt^{wrdr} mz Jiszs. Mc k^z Galesia 3:11 x
Hibru 10:38.

mōngr da kxnlz kxnapulr ncblo, utc, animol x da kx nzngrlaneng. ☆

²⁴ Mz nzmukrde lcde, Gct ayrplapxle nidr mz nzrlr-krbzle badr nzmncz-krbzlr mz zmatq ngr drtwr kxtrka kcng tqyclzm mz nabzdr. Delc tzale-etr-ngrdr da kx mya-zlwzng drtq.

²⁵ Nztekqtrlr nzlxngiti-krdr nzalvztrngr angidr, mz nzlxngiti-alzu-krdr natq ngr nzpokianger. Nzangiolr da kcng tqwzng Kxrpalz, a' trnzangiolru nide kc tqtakitrde nzglqpx-zvz-krerule tqyc tqyc. Eu, angida.

²⁶ Mz nzmukrde lcde, Gct sc tqaprcpebzle badr nzmncz-krbzlr mz zmatq ngr drtwr kxtrka kx mya-zlwzng drtq. Dekc olvz tztekqtrlr nzrmwimi-krdr ncblo, mz da kx vz-rbr-zlwzng mz nzobqkr Gct, krlc nzrmwimi-alzu-krdr olvz kztedrng.

²⁷ Mz nqmō lcpwz, ncblo drtwrdr bao mz nzrmwimi-krdr olvz x pqtr alzu mz drtwrdr nzrmwimi-krdr ncblo kztedrng. Ncblo lcng nzrtrngzbnz badr ncblo mou da kx mya-zlwzng drtq. X da kx prpxm elr nztwz-krdr nzayrplapxng mz nrkrdrtdr kx takitrde nzvz-rbr-zlwz-krdr lc.

²⁸ Zbz Gct sc tqaprcpebzle badr mz zmatq ngr drtwr kxtrka mz nzrtrngzti-zvz-krbzlr da kx trtakitrpleu nzalekr leplz le. Murde aoti drtwrdr kx trtakitrpedeu nzlxngiti-krdr nide.

²⁹ Nabzdr yrbulzm mz da kxtrka, da kxdrka'ngr, x da kx nzvz-rbr-zlwzng kang kqlu, mz nzngini-krdr kxnztrkibrng, kxnzrkcmnz-ngrng,

☆ **1:23** Lou Kcpwz 4:16-18; Sam 106:20

x kxndobu-zlwzng, x kx drtwrdr trkabz mz leplz, kxznribqng, kxnzota-zvzng, kxnzesabrng, kxnzabrtzlvzlr nzaetq-krdr drtq leplz, x kxnzr-pikiting leplz.

³⁰ X nzpibqti-kzlr nidr. Nzpxtpx-zlwz-ngrdr Gct. Nzxpqbrlr-ngrdr leplz. X nzglqpx-lzbqng. Suti drtwrdr nzale-krdr namrlzu r alwx kang kqlu. X trnzamatqlru trtedrng badr lxedrng.

³¹ Nzngqngung murde trnzlxngitilru kx nzvz-rbrng. X trnzylqlru natqdr. Trpnzngr nivz mz nabzdr murde tryc-ngru drtwrdr leplz, a' vz zvz nzaetq-krdr drtqdr.

³² Vz zvz nzale-krdr da lcng, kxmule-esz' nzkr-lzpelr mz nabzdr kx Gct rpile kx leplz kxnmulr lcng takitrde nzbztx-krpwzlr. A' da kx trka zlwz, nzabrtzlvz-kzlr kzdu-kzng leplz kcng tztrrngz-kzpzng da lcng tqtrka.

2

Gct Sa Na-ayzlu-ngrbzle Da Mz Leplz Amrlx Mz Nzvz-nqblq-krde Da Kx Nzalelr

¹ Doa kx rpile kx takitrde leplz nzayrplapx-katongr mz alwx ngrdrng vz-rbr! Trmrlzu nzpibqti-krm nidr mz drtwrm. Murde vz-rbrq mz nzobqkr Gct, mz nzale-kz-krm alwx lcng. ☆

² Napipx Gct kx leplz nzvz-rbrng o trtingr. X krlzku kx da kxpipxle tubq zvz.

³ Bzkq rpiq kx narlapxq kalr mz nzayrplapxkr Gct nim, murde vz-rbr-kzq da kc tzwai leplz kcng tqatubqtiq.

☆ **2:1** Matiu 7:1-2

⁴ X bzkq obqsoq nzmyalzkr zmrlz ngr Gct, x nzaenzli-zpwx-krde. Mwx trkrlzwq kx zmrlz ngrde kxmyalz drtwr ngrde kx trayrplapxleu nim mzli ka, murde narnginyzm mzli r nzyzlu-krm drtwrm x nzteqtr-krm nqm q nr drtwrm.

⁵ A' narm mqngi zlwz murde pxtxpx-ngrn nzteqtr-krm nqm q nr drtwrm. Mz nzmu-krde lcde, aetunepx-zlwzq nzayrplapxkr Gct nim. Mz Mzli Kxmatq kc navzm, Gct sa napipxle kxnzvrbrng o trtingr, mz nzvz-nqblq-krde nztubq-esz'ngr-krde. X sa na-ayrplapx-zlwzle kxnzaleng alwx mz zngya ngr drtwrde.

⁶ Murde sa na-ayzlubz Gct mz doa kxes' mz nzvz-nqblq-krde da kx alele mz nrlc ka. ✧

⁷ Sa nakabzle nzlungr kxboi mz leplz kcng tzvz zvz nzale-krdr da kxtubq, mz nzaenzli-krdr nzamatqkr Gct nidr x nzprtr-krdr mz nzlungr kc tqyc zvz.

⁸ A' sa na-ayrplapx-zlwzle mz zngya ngr drtwrde leplz kxdrka'-ngrng kcng tzpxtxpx-ngrdr natqde mz nzrpi-krbzle badr da kxtubq x da kx vz-rbr. Murde nzvz-nqblq-zvzlr me pnz drtwrdr esz'-krdr.

⁹ Gct sa nabatrpzle nzkxpungr x nzetqkr drtq mz leplz amrlx kcng tzalelr da kxtrka. Sa na-ale-kaipzle mz lr Jiu mz nzngini-krdr leplz kcng tqmcpx-kaileng, x kxtrngiulrJiu kcng ate.

¹⁰ A' sa nabatrpzle nzmrluengr kxetu x nzmnc-zpwxngr mz leplz amrlx kcng tzalelr da kxmrlz. Sa na-ale-kaipzle mz lr Jiu, x kxtrngiulrJiu kcng ate.

✧ 2:6 Sam 62:12; Nzyrplapxngr 24:12

¹¹ Murde mz nzobqkr Gct leplz amrlx nzesz'ting, x kxmu nzayzlu-krbzle da badr tubq zvz.

¹² Sa na-adwatr Gct mz Hxl kxtrngiulrJiu kcng tzaleng alwx, kxmule-esz' trnzkrzlru Loukxtr scde. X sa na-ayrplapxle lr Jiu kcng tzxpqbrlr-ngrdr Loukxtr, mz nzkriz-zpwx-krdrle.

¹³ Murde nztubqkr leplz mz nzobqkr Gct, tr-tutxtrpwzu mz nzxlr-krdr o nzkriz-krdr Loukxtr, a' vzpxm mz nzvz-nqblq-zpwx-krdrle.

Gct Sa Na-ayzlu-ngrbzle Da Mz KxtrngiulrJiu Mz Nzvz-nqblq-krde Da Kx Nzalelr

¹⁴ Krlzamu kx kzdung kxtrngiulrJiu nzvz-nqblqlr natq kc tqkabz Loukxtr, murde nzkrizlr kx da lcng mrlz, kxmule-esz' trnzxlriru Lou lc.

¹⁵ Krlc aelwapx-ngrde kx kzdung natq mz Loukxtr ycpxe-kaip mz nabzdr. X mz nabzdr nzkrizlr mzli kznike nzale-ngrdr da kxmrlz o da kx vz-rbr.

¹⁶ Da lcng amrlx sa naprtzng mzli kc Gct naobqtr-ngrde mz nqmq kr leplz amrlx x mz drtwrdr kcng tqyc-kapq. X sa nayrlqle Mevalu Jiszs mz nzpipx-krde kx nqmq kr leplz mrlz o trtingr. Krlc Nrpa kc tqyapwxtipxx.

Gct Sa Na-ayzlu-ngrbzle Da Mz Lr Jiu Mz Kxmu Nzvz-nqblq-krdr Loukxtr

¹⁷ Nimu lr Jiu, lalztqmamu bange. Kzdung nimu nzrpilr kx nimu doa neng Gct murde krlzamu Loukxtr. X glqpx-lzbqamu kx tubqamu mz nzobq-krde.

¹⁸ Krlzamu me pnz drtwr Gct x krlz-kzamu da kxmrlz x da kxtrka, murde nzalvztrpz bamu Loukxtr.

¹⁹ Mz drtwrmu rpiamu kx namailzbzmu leplz kcng tzmnc-mrbrng mz Gct, mz nzalvztr-krbzmu da angidr.

²⁰ Rpi-kzamu kx krlzamu nzalvztrngr leplz kcng tzapulr doa kxnztopwzng, x krkcng trpnzng da kx pnz drtwrdr. Murde krlzamu Loukxtr mrkc tqyclz-ngrm da amrlx kx takitrde nzalvztrngr angidr x da kx suti drtwr Gct nakrlzku.

²¹ Alvztramu leplz, a' trvz-nqblqwamuu nzalvztr-krmu lcng. Yapwxtipxbzmu badr leplz kx bzkq nzpnang da, a' nimu ke ye tqpnaamu da.

²² Rpi-bzmu badr kx nayrlq-angidrlr nzesalz-krdr mz nzyrlzng, a' trvz-nqblqwamuu natqmu esz'-krmu. Pxtxpx-ngrnamu nzangio-krmu mqngr drka'ng kxnzlx, a' nimu ke ye tqatrkatilzbqamu mz nzmale-krmu da kx pnatipxmamu mz ma ngr nzangiongr nidr.

²³ Glqpx-lzbq-ngrnamu nzmncxz-krbzmu mz Loukxtr, a' rnzlvzoamu Gct mz nzobqkr kx-trngiulrJiu kcng trnzrlxngitiung mz nzxpqbrlr-krmu natqde.

²⁴ X atutramu natq Gct mz Nzryrngrkxtr ke tqrpil kx, *“Leplz kcng trngiulrJiu nzpibqtilr Gct murde da kx nzale lr Jiu, mz nzngini-krdr leplz nedeng.”* ☆

²⁵ Nzrpakrngr ngi rkx mz nrkrdrdqmu, nimu lr Jiu, kx nimu doa neng Gct. X drtwr

☆ **2:24** Asaea 52:5; Esikel 36:20-21

ngrde ycbz mz nzvz-nqblq-krmu Lou scde. A' nzm naxpqbrrl-ngrnamu Loukxtr apuamu leplz kxnmnc-mrbrng kcng trnzpakru.

²⁶ X leplz kcng trngiulrJiu kx trpnzngr scdr rkk ngr nzrpakrngr mz nrkrdrtdqr, nzngini-krdr doa neng Gct tuo mz nzvz-nqblq-krdr Loukxtr, da kc tqwaile mz lr Jiu.

²⁷ Nimu lr Jiu twzamu rkk ngr Gct lc. Krlzamu x rlwxamu Loukxtr. A' kzdung nimu trnzvz-nqblqlru. A' kzdung kxtrngiulrJiu nzvz-nqblq-angidrlr Loukxtr, kxmule-esz' trnztwzlru rkk ngr Gct mz nrkrdrtdqr. Mz nzmu-krde lcde, mz nzobqkr Gct nqmqlcng li, sa napibzle kx nqmqlkrmu vz-rbr, a' nqmqlkrdr tubq.

²⁸ Nznginingr doa ne Gct trtuou mz lxedex trtede nzngini-krdr lr Jiu o mz nzrpakrngr nrkrdrtdqde. Murde tr-rblxu nzatrkatngr rkk lcng mz trnzrvz-nqblq-ngru Loukxtr.

²⁹ A' doa kx ngi lr Jiu angidr mrlztile x vz-nqblqlc Gct mz nabzde. X rkk angidr alepxm Mqngrkxtr mz nabzde. Nzrpakrngr angidr ngi da kx trnzmcu mz nabz leplz, a' trngi-tpwzu rkk mz nrkrdrtdq ncblo. Kxmule-esz' leplz trnzglqlzlr doa lc tqtwzle rkk lc mz nabzde, a' Gct sa naglqlz-zpwxle nide.

3

¹ ? Nzmu doa trtubqu mz nzobqkr Gct mz nzngini-krde lr Jiu, myx kxmule, lr Jiu nzmyaszpxlr kxtrngiulrJiu o trtingr? ?X mrlz nzrpakrngr nidr o trtingr?

² Lr Jiu nzmyaszpxlr kxtrngiulrJiu mz da kxkqlu. X krlc kc tqmyapxbz, Gct yrlqlc nidr

mz nzacive-krdr natqde kcnq mz Nzryrngrkxtr, mrkc tzyrongr da kcnq tqesalz-ngrbzle badr.

³ Da zpwxtx kx kzdung nidr trnzylq-angidrlru natqdr mz nzvz-nqblq-krdr Gct. ?A' myx kxmule, drtwr ngrde kx Gct trnayrlq-angidr-kzleu natqde x trna-atutrleu da kx esalz-ngrbzle badr mz Nzryrngrkxtr?

⁴ Bzkqtx pnz! Murde Gct sa nayrlq-angidrlrle natqde, kxmule-esz' leplz amrlx nztaong mz da kx nzpilir. Murde King Devet yrle kx, *“Tubqq mz nzrpi-krme bange kx vz-rbrx, x mz nzyrlq-krm nzayrplapxngr ninge.”* ☆

⁵ Mwx kzdung leplz narpilir kx, “?Nzmu alwx rgrng nzaopx-angidrlr nztubqkr Gct x nztr-krde, e nike, vz-rbr mz nzayrplapx-krde nigr Gct mz zngya ngr drtwrde?”

⁶ Bzkqtx pnz! Murde Gct natubqpwx mz nzpipx-angidr-krde nztubqkr lr nrlc o nzvz-rbr-krdr.

⁷ A' mwx, kzdq kxdrka'ngr lc narpi-moule kx, “A' nzmu nzpokia-krnge aopx-angidrlrle kx Gct atutr-zvzle natqde, x batrpzle leplz nzglqpx-krdr nide, drtwr ngrde kx okatrx nide. ?A' nike tqayrplapx-ngrbele ninge?”

⁸ A' drtwr lc vz-rbr, murde batrple bagu nzrpi-krqu kx mrlz nzale-krqu alwx, murde batrpzle mz leplz nzglqpx-krdr Gct. X kzdung leplz nzpibqtilr ninge mz nzrpi-krdr kx sc tqyapwx-tipxx da lc! A' takitrde Gct nzayrplapx-krde nidr mz natq lc.

Trpnzngr Leplz Kxtubq Mz Nzobqkr Gct

⁹ Pipeku kx lr Jiu nzmyaszpxlr kxtrngiulrJiu o trtingr. A' mz nzobqkr Gct, lr Jiu trnzmyaszpxlru kxtrngiulrJiu, murde leplz amrlx nzmncclzbzng mz zmatq ngr alwx.

¹⁰ Da kc tqwai nzpikr Nzryrngrkxtr le kx,
“Trpnzngr leplz kxes' kxtubq.

¹¹ *Trpnzngr kx yrplapx. Trpnzngr kx rtangr-tile Gct.*

¹² *A' nzesablqtilr Gct amrlx ngrdr, x drtwrdr esz'ti mz nzale-krdr da kxtrka. Trpnzngr leplz kxes' kx ale da kxmrlz.*

¹³ *X mz nzymne-krdr nzmailzlr leplz mz nzbatr-krbzlr nzbz-krdr esz'-krdr. Natqdr nzlvati apule nipna kr ningidoe kc tqrtq.*

¹⁴ *Natqdrng amrlx ngi dalr nzrpikitingr, nzr-pibqtingr, x nzrpilzngr.*

¹⁵ *Nzoliq-zvzng mz nzrnibqngr.*

¹⁶ *X nzodang x nzaetqbzlr drtq leplz mz nzvzne-krdr.*

¹⁷ *X trnzkrzlzlu nzmnc-krdr badr leplz mz nrw.*

¹⁸ *X trnzamrluelru Gct.” ✧*

¹⁹ Krlzpeku kx nike pipx Loukxtr pibzle mz lr Jiu kcng tzmncclzbzng mz zmatq ngrde. Loukxtr pile natqdeng murde naopx kx mz nzobqkr Gct leplz amrlx nzvz-rbrng, kxmule-esz' lr Jiu o kxtrngiulrJiu, x takitrde Gct nzayrplapx-krde nidr. Dekc trpnzngr leplz kx narpile kx tubq mz nzobqkr Gct.

²⁰ *Mz nzm-krde lcde, trpnzngr leplz kx natubq mz nzobqkr Gct mz nzvz-nqblq-krde*

✧ **3:18** Sam 14:1-3; 53:1-3; Kxalvztr 7:20; Sam 5:9; 140:3; 10:7; Asaea 59:7-8; Nzyrplapxngr 1:16; Sam 36:1

natqđeng amrlx, murde rblxbz mz leplz amrlx nzale-zvz-krdrle. Loukxtr trngiu dalr nzatubqtingr leplz mz nzobq-krde, a' ngi dalr nzaelwapxngr kx leplz kcng trnzyatrpwzung mz nzvz-nqblq-krdrle takitrde nzayrplapxngr nidr murde nzaleng alwx. ☆

Lrpzki R Gct Mz Nzatubqti-krde Leplz Mz Nzobq-krde

²¹ X mzli ka mz nzvz-krm Kraes, Gct aopx-zpwxbzle lrpzki rde kx natubq-ngrbz leplz mz nzobq-krde. Lrpzki lc trngiu Lou sc Mosis, a' ngi lrpzki kx Gct esalz-ngrbzle mz Lou sc Mosis x mz natq profet kcng bqnc.

²² X lrpzki lc nide sele: Gct aotipe drtwrde kx leplz natubqzbzng mz nzobq-krde mz nzbrtikr drtwrdr Jiszs Kxnzmcpz mz nzrkatx-krde alwx ngrdrng. Murde Jiszs atutr-zpwxpele me pnz drtwr Gct x Lou scđeng amrlx. Kxmule-esz' doa kznike, a' krlc lrpzki r leplz nztubq-krbzlr mz nzobqkr Gct. ☆

²³ Murde leplz amrlx nztaong mz alwx x trnzy-atrpwzu nzvz-nqblq-krdr nqmđ kxmrlz kxtr kc tqyrlqzbz Gct badr.

²⁴ A' Gct naka-nrbalqzbzle nzrlapxngr lc mz leplz amrlx, vzpxm mz zmrlz ngrde kxmyalz. Murde Mevalu Jiszs xpepxpele alwx ngr leplz amrlx mz nztekqtr-krde nidr mzli kc tqbz-ngrde nidr mz kros.

²⁵⁻²⁶ Gct tubq-esz'ngr mzli kc x mzli ka. X nztubq-krde drtwr ngrde kx na-ayrplapxle kxn-zaleng alwx, murde trpnzng da kxtrka kx nam-

cle. Gct aenzli-zpwxle nzvz-krm Mevalu Kraes mz nzayrplapx-krde leplz kcng pnz mz alwx ngrdrng. Murde yrlqle Mevalu mz nzngini-krde blz kx naxpepxle alwx amrlx ngr leplz amrlx kcng pnz, krkcng mzli ka x mzli kc navzm. X mz nzngini-krde blz kc, Jiszs katxde alwx ngr leplz kcng tzbtri drtwrdr mepyr ngrde mz nzbz-krde nidr, murde nakatx-kzle nzngyatikr drtwr Gct nidr. Dekc tqatubqti-ngrde nidr mz nzobqkr Gct. Gct tubq-esz'ngr murde ayrplapx-zpwxle alwx amrlx. X atubqtibzle mz nzobq-krde leplz kcng tzlxngitilr Jiszs. Delc Gct tqngi nou nztubqngr amrlx. ☆

²⁷⁻²⁸ Mz nzmu-krde lcde, trpnzngr doa kx takitrde nzglqpx-lzbq-krde. Murde trpnzngr kx vz-nqblq-zvzle Loukxtr. X nztubqkr doa tuo mz nzrlxngitingr. Mz nzmu-krde lcde, nztubq-krde vztzpxpq mz nzlxngiti-krde Jiszs, a' trngiu mz nzvz-nqblq-krde Loukxtr.

²⁹⁻³⁰ Nimu lr Jiu, bzkq rpiamu kx Gct lc nide Gct rmu txpwz, x trngiu Gct r krkcng trngiulrJiu. Murde Gct esz'txu kc tqaclvele leplz amrlx. X atubqtibzle lr Jiu mz nzlxngiti-krdr Jiszs x atubqti-kzpzle kxtrngiulrJiu mz nzrlxngitingr kcpwz. ☆

³¹ A' mwx kzdung leplz napilr kx nzatubqtikr Gct leplz mz nzrlxngiti-krdr ayrkrpxle Loukxtr. A' bzkqtx pnz! Murde pipxle da kcpwz tqpipx Mosis mz Lou lc.

4

☆ **3:25-26** Nou 22:8; 1 Timoti 2:6; 4:10; Livae 17:11 ☆ **3:29-30**
Galesia 3:20

*Nztubqkr Ebraam Mz Nzobqkr Gct
Tuo Mz Nzbrtikr Drtwrde Gct*

¹ Mrlz. Na-aoti drtwrgu Ebraam, kc tqngi melrmqgr, nigr lr Jiu. ?Nike rmctile mz nztubqkr doa mz nzobqkr Gct?

² Nzmu Gct na-atubqtile nide mz da kx aleleng, tr-rblxu nzglqpx-lzbq-krde. A' mz nzobqkr Gct trpnzngr da kx takitrde nzglqpx-lzbq-krde.

³ Murde Nzryrngrkxtr rpile kx, "*Ebraam tubq mz nzobqkr Gct, murde brti drtwrde nide.*" ✧

⁴ Trau kc tztwz leplz mz nzwz-krdr trngiu da kx nzrka-nrbalqng, murde nzmabztilr trau lc.

⁵ A' rblxbz mz leplz nzwztingr nztubqng lc. Murde ka-nrbalqbz Gct nztubqng lc mz doa kx brti drtwrde nide kc tqatubqtile kxdrka'-ngrng.

⁶ Devet pi-kzle da lc mzli kc tqycmnepx-ngrde nzabrtz-zlwzkr ncblo kc tqatubq mz nzobqkr Gct kxmule-esz' trwztileu.

⁷ Murde rpile kx, "*Doa kx nzipq mz alwx ngrde, drtwrde elalz-zlwzm.*"

⁸ *Murde mz nzobqkr Yawe trvz-rbrpeu.*" ✧

*Ebraam Tubq Mz Nzobqkr Gct Mzli Kc
Trtwzka-ngrde Rkx Ngr Gct*

⁹ Mrlz. ?Myx kxmule, zmrlz ngr Gct lc vzbz mz lr Jiu txpwz, mz nzrpakr-krdr mz rkx ngr Gct? Trtingr! A' vz-kzpz mz kxtrngiulrJiu kcng trnzrtwzu rkx lc. Krlzpeku mrkc tqrpile mz Nzryrngrkxtr kx, "*Ebraam tubq mz nzobqkr Gct, murde brti drtwrde nide.*" ✧

✧ **4:3** Nou 15:6; Galesia 3:6; Hibru 11:8-12; Jemes 2:23 ✧ **4:8**
Sam 32:1-2 ✧ **4:9** Nou 15:6; Rom 4:3

10 ?Myx kxmule, Ebraam tubq mz nzobqkr Gct mzli kc trnzpokrka-ngrde mz rkk ngr Gct o mz nibrdepe? Mzli kc trnzpokrka-ngrde!

11 Murde mz nibrde Gct kabzle natq mz Ebraam kx napokr ☆ mz nzngini-krde rkk ngr nzlxngiti-krde nzesalzkr Gct x nztubq-krde mz nzobq-krde. Mzli lc trnzpokrka-ngrde, Ebraam trngiulrJiu, a' tubq mz nzobqkr Gct. Mz nzmukrde lcde, Ebraam apule trte leplz amrlx kcng tzbtri drtwrdr Gct, kxmule-esz' trnzpakrung, murde navz-nqblqlr nide mz nzbrti drtwrdr Gct. Delc nztubq-krdr mz nzobqkr Gct vzpxm mz nzbrtikr drtwrdr nide.

12 X Ebraam ni-kzde trte lr Jiu kcng tzipakrung, mzli kznike nzvz-nqblq-ngrdr nide mz nzbrkr drtwr kcpwz tqvz-nqblqle mzli kc trnzpokrka-ngrde.

*Nzrtwzngr Da Kcng Tqesalz-ngrbz Gct Vzpxm Mz Nzrlxngitingr Natqde **

13-15 Esalz-ngrbz Gct mz Ebraam kx sa nakabzle nrlc atwrnrngr bade x doa nedeng mz nznrginyzkrdrle. Nzmu Gct na-atutr-tpwzle nzesalzkrdeng mz leplz kx nzvz-nqblq-zvzlr Lou scdeng,

☆ **4:11** Nou 17:9-14 * **4:12** Gct esalz-ngrbzle mz Ebraam da tq mz Buk Ngr Nou. 1) Ebraam nanginede dq doa ncblo x nqvi lrde sa navz zvz. Da lc ngida mzli kc tzmengr mz Aesak, x nqvi lrde dekc tqngi neidu lrdr lr Israel, x mz nibrde lr Jiu. 2) Doa kx nzvzpxmqng bade nakqlu-zlwzng x narblx nzrlwxng. X nanginide trte leplz kxkqlu mz nrlc tulvzo. Da lc ngida murde kxnzrlxngiting amrlx nidr doa nedeng. 3) Sa nakabz Gct nrlc atwrnrngr bade x doa nedeng. Sa na-atutrle da lc mzli kc nayzlu-ngrm Jiszsz mz nzacive-krde kxnzrlxngiting amrlx mz nrlc kxmuna. Mzli lc kxtrnzrlxngitiung amrlx sa namncng mz Hxl.

drtwr ngrde kx mane nzbrtikr drtwrgu nide. X mane kz da kx esalz-ngrbzle murde rblx nzvz-nqblq-zvzngr Lou scdeng. A' Gct tresalz-ngrpwzleu da lc murde Ebraam vz-nqblq-zvzle Lou scdeng, a' murde nztubq-krde mz nzobq-krde vzpxm mz nzbrtikr drtwrde nide. Gct esalz-kai-ngrbzle da lc mz Ebraam, x sc tqka-atebzle Loukxtr mz Mosis. Delc rblx nztubqkr Ebraam nzvzpx-krmle mz nzvz-nqblq-krde Lou sc Mosis.

✧

16 Mz nzmu-krde lcde, Gct atutr-tpwzle nzesalz-krdeng mz leplz kx nzbtri drtwrdr kx sa nakabzleleng badr. Murde naka-nrbalqbzle mz kxnzrlxngiting nztubqngr lc. X mz nzrlxngitigr, nakrlzku kx natwzku da kc tqesalz-ngrmle bagu, kxmule-esz' vz-nqblqku Lou sc Mosis o trtingr. Murde Ebraam apu-zpwzle trte leplz amrlx kcng tzlzngitilr Gct, da kc tqwaile.

17 Krlc drtwr ngr Nzryrngrkxtr mz nzrpi-krde kx, *“Mcpxpex nim nznngini-krm trte leplz ngr nou x nqvi kxkqlu.”* ✧ Da lc ngida murde mz drtwr Gct Ebraam nide melrmqgu nigu amrlx. X Gct lc rngisc zmatq ngr nzatulz-krde kxnzbnzng x mz nzwzng da mz nzymne-krde tpxwz.

18 Kxmule-esz' rblx, a' Ebraam obqtixle mz nzrlxngitingr x nipede trte leplz ngr nou x nqvi kxkqlu, da kc tqwai nzpi-krbz Gct bade kx, *“Nzkqlukr doa nemqng sa na-apule vri ngr bongavz.”* ✧

19 Nzbrkr drtwrde trycngrlru, kxmule-esz' krlz-zpwzle kx trtakitrpeleu nide nznngini-krde trte

✧ **4:13-15** Nou 12:3; 13:14-17; 15:4-5; 17:2-8, 16, 19; 22:15-18; Galesia 3:17, 29 ✧ **4:17** Nou 17:5 ✧ **4:18** Nou 15:5

doa, murde yiz ngrde krlzpebzle nzpnu-rpwxmz-nrade-rpwxmz (99), x Sera nippede blang x vz-nrbalq.

²⁰ X drtwrde trlitrpwzu mz nzatutrkr Gct natqde kalr. A' nzrlxngiti-krde xplrnx, x glqlz-zvzle Gct mz da kx esalz-ngrbzle bade.

²¹ Murde brti zvz drtwrde kx sa na-alele da lc.

²² Mz nzm-krde lcde, *“Ebraam tubq mz nzobqkr Gct.”* ✧

²³ Natq lc tzrpibz kx, *“Nide tubq mz nzobqkr Gct, murde brti drtwrde nide,”* trnzyrou mz nzokatr-krde Ebraam esz'-krde.

²⁴ A' nzyro kz mz nzokatr-krde nigu, murde nakrlzku kx tubqku mz nzobq-krde mz nzabrtr-krbzku drtwrgu mz Gct kc tqatulz-mople Kxetu rgu Jiszs mz nzbz-krde.

²⁵ Gct rlrpx-ngrde Jiszs nzayrplapxngr nide mz alwx ngrgung mz nzbz-krde. X atulz-mople nide mz nzbzngr murde natubqku mz nzobqkr Gct mz nzxpepxkr Jiszs alwx lng.

5

Kxnzrlxngiting Nzmnclxblr-moung Badr Gct Mz Nrwx

¹ Mz nzm-krde lcde, tqtubq-nrgu mz nzobqkr Gct, murde lxngitiku Kxetu rgu Jiszs Kxnzmcpx x brti drtwrgu nzbz-krde mz nzarlapx-krde nigu. Mz nzm-krde lcde, navz zvz nzmnc-lxblr-krdu badr Gct mz nrwx.

✧ 4:22 Nou 15:6

² Mz nzlxngiti-krgru Kraes, dekc tqmnc-aepztr-ngrbzku mz Gct. X okatr-zvzle nigu murde nza-xvctrpebzku mz Kraes. X abrtzlvzku nzobqtipx-krgru nyzylu-krm Kraes, murde mzli lc sa naprtr-kzku mz nzmyalz-krde.

³ X abrtzlvz-kzku nzxpungr mz nrlc ka, murde alvztrple bagu kx natu-amqngilzbzku bade mz nzrlxngitingr.

⁴ X nztu-amqngilz-krbzku mz nzxpungr alvztrple bagu kx drtwrgu natubq. X nztubqkr drtwrgu alvztrple bagu kx naobqtipxku Gct mz nzangidati-krde natqde.

⁵ X krlzku nzbrtikr drtwrgu Gct nzangidati-krde nzobqtipx-krgru, murde xngibzku nivz lrde mz nabzgu mz nzwzkr Mqngrkxtr kc tqkamle bagu.

⁶ Na-aoti drtwrmu da lc. Rblxm bagu, nigu leplz, nzarlax-lzbq-krgru. Kxmule-esz', a' mzli kc tqkrlzpe-ngrbzle mzli kc tqyrlq Gct, Kraes bz mz nzarlax-krde nigu kxnzaleng alwx.

⁷ Leplz kxpipz kx nzrlrpx-lzbq-ngrdr mz nzbz-krdr nzarlaxngr doa kzble, kxmule-esz' doa lc tqmrlz. A' mwz kzdq leplz narlrpx-lzbqngr mz nzbz-krde mz nzarlax-krde doa kx mrlz-esz'ngr.

⁸ A' mzli kc tqalebe-ngrgu alwx, Gct aelwapx-ngrde nzmrlzti-zlwzkr nivz lrde nigu, mz nzbzkr Kraes nigu.

⁹ Naopx angidr kx Kraes sa na-arlapxbzle nigu mz zngya ngr drtwr Gct. Murde tubqpeku mz nzobqkr Gct mz nzbzkr Kraes nigu.

¹⁰ X naopx angidr kz kx mz nztulz-mou-krmle mz nzbzngr, Kraes sa na-arlapxbzle nigu mz

nzayrplapxkr Gct nigu kalr. Murde Gct amnc-lxbltrpele nigu badr mz nrwx mz nzbzkr Mrlxde mzli kc tqnginibe-ngrgu enqmi rdeng.

¹¹ X mou, mzli ka abrtzlvz-zvzku Gct mz nzmnc-lxblr-krgru badr mz nrwx, mz nzwzkr Kxetu rgu Jiszs Kxnmcp.

Adzm Twzmle Nzbzng, A' Kraes Twzmle Nzlungr

¹² Mzli kc Adzm tqtao-ngrde mz alwx, alwx lc nzaxvctr-kzpz mz nqvi lrde. X alwx lc twz-kzple nzbzng. X nzbzng lc prtzbz mz leplz amrlx murde nztao-kzng mz alwx mz nzngini-krdr nqvi lr Adzm. ☆

¹³ Nzvz-rbr-krdr lcng ngi alwx, kxmule-esz' Gct tr-rkakupz Loukxtr. A' rblx nzrpingr kx leplz nzaleng alwx mzli kc trgalr lou kx na-alvztr-ngrde nidr mz alwx.

¹⁴ Kxmule-esz', a' opx angidr kx nzaleng alwx murde nzbzng. Abzo mz mzli nyz Adzm krlzmlle mzli nyz Mosis, leplz amrlx nztaong mz alwx x nzbzng, kxmule-esz' trnzxpqbrlr-ngrdru natq angidr lc tqkabz Gct, da kc tqwai Adzm.

Mrlz nzkrz-krgru kx Adzm ngi rkx kc tqplzpx-kaile Kraes kc navzm, mz nzbatr-krbzlr da mz leplz kxkqlu.

¹⁵ A' alwx ngr Adzm blepx-zlwzbz mz nzipqkr Gct leplz. Murde Adzm batrpzle nzbzkr leplz kxkqlu mz alwx ngrde. A' Jiszs Kxnmcp batrpzle nzipqngr leplz kxkqlu mz zmrlz ngr Gct kc tqka-nrbalqbzle badr.

☆ 5:12 Nou 2:17

¹⁶ Mz nqmq lcpwz, alwx ngr Adzm batrpzle nzayrplapxngr leplz kxkqlu mz nzbzngr. A' da kc tqka-nrbalqbz Gct batrpzle nzrkapxngr alwx ngr leplz kxkqlu x atubqtile nidr mz nzobq-krde.

¹⁷ Da zpwx kx alwx ngr Adzm amnclzbzle leplz mz zmatq ngr nzbzngr. A' nzwzkr Jiszs Kxnzmcpz myaszpx-zlwzle da lc. Murde leplz amrlx sa na-aovxio-zpwxlr zmatq ngr alwx x nzbzngr mz nzprtr-krdr mz nztubqngr kc tqka-nrbalqbz Gct badr.

¹⁸ Mz nzmu-krde lcde, alwx kc esz' tqale Adzm drtwr ngrde kx takitrde Gct nzayrplapx-krde leplz amrlx. Mz nqmq lcpwz, da kc esz' tqale Kraes mz nzvz-nqblq-krde me pnz drtwr Gct mz nzbzngr, drtwr ngrde kx leplz amrlx kcng tzrlxngiting nzkrzlzr nzprtr-krdr mz nztubq-krde x mz nzlungr kxboi.

¹⁹ Leplz kxnzkqlu nzaleng alwx, murde Adzm trvz-nqblqleu natq Gct. X mz nqmq lcpwz, leplz kxnzkqlung sa natubqng mz nzobqkr Gct murde Jiszs vz-nqblq-zvzle natqde.

²⁰ Gct kao-ngrmle Loukxtr murde leplz nakrlz-zpwxlr kx nzvz-rbr-zvzng. A' mz nzetunepxkr nzmc-krqu kx alwx ngrgung trka zlwz, zmrlz ngr Gct kc tqmyalz sc tqetunepx kz, mz nzipq-krde nigu leplz.

²¹ Mz nzmu-krde lcde, mzli kc leplz amrlx nzmnciz-ngrbzlr mz zmatq ngr alwx x nzbzngr. A' mzli ka mz nzvz-krm Kraes, mnclzpebzku mz zmatq ngr nzokatrkr Gct nigu, x tubqku mz nzobq-krde. Delc sa naprtrku mz nzlungr kxboi, murde nzwzkr Kxetu rgu Jiszs Kxnzmcpz.

6

*Kxnzrlxngiting Trzmnclzpepwsung Mz
Zmatq Ngr Alwx, A' Nzmnclzbzng Mz Gct*

¹ Mwx kzdq doa napile kx mrlz nzale-zvz-krqu alwx, murde nabatrpzle nzetunepx-zvzkr zmrlz ngr Gct kc tqmyalz.

² Bzkqtx pnz! Murde mz nzobqkr Gct bzpeku badr Kraes x trmnclzpekuu mz zmatq ngr alwx. Doa kx bzpe rblxbz bade nztao-krde mz nzatalzngr. X mz nqm q lcpwz, mz nzmnc-krqu mzli ka, na-apusr-lzbqku kx nrkrdrdqgu bzpe, murde bzkq vz-nqblqpeku alwx x trpengr nzmctx-krbzku bade.

³ Nadcp x mz drtwrmu kx nzaxvctrpebzku mz Mevalu Jiszsz mz nzwrkxtr-krqu, x mz nzobqkr Gct bzpeku badr mz kros.

⁴ Bzpeku badr x nzyrtzmqpe-kzku badr mz nzwrkxtr-krqu, murde natwz-kzku nzlungr kxm-rna kxtr, da kc tqwai Kraes mzli kc tqatulz-ngr-mop Gct Trtegu nide mz nzbzng, mz zmatq ngrde kx myalz-esz'ngr.

⁵ X mz nzaxvctr-krbzku bade mz nzbzng mzli ka, sa na-axvctr-zpwx-kzpzku bade Heven, mzli kc na-atulz-kzng Gct nigu mz nzbzng, da kc tqwaisrpe-ngrde Kraes.

⁶ Murde krlzpeku kx nqm q ngr alwx kx vzo la mz nabzgu nztqlvzmitrpe Kraes mz nzodatitpx-krbz Gct zmatq ngr alwx nzaclve-krde nigu. Delc mzli ka trmnclzpepwszkuu mz zmatq ngr alwx.

⁷ Murde leplz kznike bzpe, drtdqde opxpe mz nzvz-nqblq-krde kc ena zmatq ngr alwx.

⁸ X mz nzbzpe-krgr lc badr Kraes, lxngitiku kx sa nalu-kzku badr.

⁹ Krlzku kx mz nztulz-krm Kraes mz nzbzng, trpengr nzbz-mou-krde, murde trmnclzpepwzu mz zmatq ngr nzbzng.

¹⁰ Mzli kc tqbz-ngrde, nzbz-krde nzwrde esz'txu, a' nzaovxio-krde zmatq ngr alwx lc tqyc tqyc. X mzli ka mz nzlupe-krde lc, mnclz-zvzpebz mz Gct.

¹¹ Mz nzmu-krde lcde, nalxngitiamu kx nimu leplz kxnzbpeng, kcng rblxbz badr nzmetx-mou-krbzlr mz alwx. X nalxngiti-kzamu kx Mevalu Jiszs mncpxpem bamu mz nzokatr-krde nimu mz nzvz-nqblq-zpwx-krmu nqm q krde mz nzwztr-krbzmu mz Gct.

¹² A' bzkq rlr-lzbqpe-ngrbzmu mz nzmncz-krbzmu mz zmatq ngr alwx, murde ma tqvz-nqblqamu. *

¹³ Bzkq pnz rlr-ngrbzmu kzdq nrlic mz nrkr-drtqmu mz alwx, nangi dalr nzalengr da kxtrka. A' rlr-lzbq-ngrbzmu mz Gct, murde kapebzle bamu nzlungr kxmrna. X rlr-lzbq-ngrbzmu bade mz nrkrdrdqmu atwrnrngr, nangi dalr nzalengr da kxtubq.

¹⁴ Murde kxmule-esz' trmnclzpepwzmuu mz zmatq ngr Lou mz nzpipx-krde kx vz-rbramu, a' suti drtwr Gct kx bzkq taoamu mz alwx. A' namnc-nqblqamu nide murde twzpeamu zmrlz ngrde kxmyalz mz nzokatr-krde nimu mz nzvz-nqblq-krmu me pnz drtwrde.

* **6:12** Drtwr ngrde kx nigu kxnzrlxngiting, rngiscgu zmatq ngr nzvz-nqblq-krgr Gct x nzesablqti-krgr nqm q ngr alwx.

Nawztrpzku Mz Gct

¹⁵ Mrlz. A' mwx kzdq doa napi-moule kx mrlz nzale-krgru alwx murde trmnclzpepwzkuu mz zmatq ngr Lou mz nzayrplapx-krde nigu, a' mnclzbzku mz zmatq ngr Gct mz nzokatr-krde nigu. A' bzkqtx pnz!

¹⁶ Murde nakrlzamu kx mzli kc tqrlr-lzbq-ngrbzmu mz kzdq ncblo mz nzwztr-krbzmu bade, drtwr ngrde kx nide kxetu rmu x mn-clzbzmu mz zmatq ngrde. Namcpz-zpwxamu da kx nangi kxetu rmu. Nangi alwx o me pnz drtwr Gct. Nzmu namcpzamu alwx, me natutr-ngrde nzbz-alongr. A' nzmu namcpzamu me pnz drtwr Gct, me natutr-ngrde nztubq-krmu mz nzobq-krde.

¹⁷ Mzli kc ena wztrpzmu mz alwx mz nzmncz-krbzmu mz zmatq ngrde. A' awi-ngrbo mz Gct kx mzli ka mcpzpeamu mz nabzmu atwrnrngr mz nzmncz-krbzmu me pnz drtwrde x da kcng tzalvztr-ngrmu mzli kc kai tqlxngiti-ngrnamu Jiszs.

¹⁸ Mz nzlungr kxmrna lc, Gct aopzpebze drtqmu mz zmatq ngr alwx, x mzli ka mcpzpeamu nzmncz-krbzmu mz zmatq ngrde mz nzale-krmu da kxtubq.

¹⁹ Krkc tqkxmu nzymne-dalitipz-krbo da lc bamu, murde narmu nayrplatrpz mz nzrlxngiti-krmu kc tqpobe. Mzli kc ena rlr-ngrbzmu nrkrdrtqmu atwrnrngr mz zmatq ngr da kx trtakitrdeu x da kxdrka'ngr, mz nzale-zvz-krmu da kxtrka zlww. A' mzli ka na-aotipe drtwrmu mz nzrlr-krbzmu nrkrdrtqmu mz Gct mz nzmncngr kxtubq, murde nztrkr nzmnc-krmu naetunepz

ZVZ.

²⁰ Mzli kc ena tqmnczl-ngrbepzmu mz zmatq ngr alwx, traotiu drtwrmu nzale-krmu da kx-tubq.

²¹ ? X nike mabztiamu mz nzmncngr lc tqmyapengr drtqmu? Murde trpnzngr da kxmrlz kx vzpxm elr. A' natutr-ngrde mz nzbz-alongr.

²² A' mzli ka drtqmu opxpe mz zmatq ngr alwx, x mnczlpebzmu mz zmatq ngr Gct. X natutr-ngrde mz nzmncngr kxtr x nzlungr kxboi.

²³ Nzrmabzitrngr alwx, natutr-ngrde mz nzbzngr. A' Gct ka-nrbalqbzle nzlungr kxboi mz leplz kcng tzaxvctrpzng mz Kxetu rgu Mevalu Jiszs.

7

Kxnzrlxngiting Trnzmnczlpepwzung Mz Zmatq Ngr Lou Sc Mosis

¹ Mzlengeng x inwengeng, ryrbo bamu mz nzngini-krmu leplz kcng tzkrlz-angidrlr Lou sc Gct. A' nadcpz mz drtwrmu kx doa mnczlbz mz zmatq ngr Lou mzli kc tqlu-ngrde.

² Na-aoti drtwrmu nzyrlzngr. Murde olvz kxyrlz namncbz mz ncblo ngrde mzli kc tqlungr ncblo ngrde. A' nzmu ncblo ngrde nabzle, olvz lc trmnczlpepwzu mz lou ngr nzyrlzngr.

³ X trxpqbrlr-ngrdeu lou ngr nzyrlzngr mz nzyrlzti-mou-krde ncblo kzble. A' nzmu nayrlzti-moule dq ncblo kzble mzli kc tqlubengr ncblo ngrde kc kai, olvz lc xpqbrlr-ngrde lou ngr nzyrlzngr.

⁴ Mz nqm̄q lcpwz, kx mzleŋgeng x inwengeng, bzpeamu badr Kraes mz nzaxvctr-krbzmu bade, x trmnclzpepwzmuu mz zmatq ngr Loukxtr. Mzli ka nepede nimu Kraes kc tqatulz-mop Gct mz nzbznḡr, murde nrade naycbz mz nzwztr-krbzmu mz Gct. *

⁵ Mzli kc tqvz-nqblqbe-ngrgu drtwrgu esz'-krgu mz nzale-krgu alwx, nzkr̄lz-krgu Loukxtr ae-tunepx zvz nzatalznḡr. X nzwz-kr̄gung amrl̄x tutr mz da kxdr̄ka'ngr x yrkr̄px mz nzbznḡr.

⁶ Mzli lcde, mnclzbzku mz lou kx nzyrong. A' mzli ka dr̄tq̄gu op̄xpe mz nzm̄nclz-kr̄bzku mz zmatq ngr Loukxtr, murde bzpeku badr Kraes. X krl̄zku nzwztr-kr̄bzku mz Gct mz nzvz-nqblq-krgu M̄qnḡrkxtr, kc tq̄m̄nc̄pxm̄ mz nabzgu x okatr̄le nigu mz nzlungr kxmr̄na.

Loukxtr Aelwapx-zpwx-ngrde Alwx

⁷ Bzkq̄ rpiamu kx natq̄nge lc dr̄twr ngrde kx Loukxtr ngi da kxdr̄ka'ngr. Bzkq̄tx pnz! Murde rbl̄xm̄ bagi nzmc-krgi kx aleki alwx, nzmu Loukxtr tr̄na-aelwapx-ngr̄pleu bagi kx vz-rbr̄ki. Nzmu lou tr̄narp̄ileu kx, “Bzkq̄ kcm̄nz-ngr̄bzme dztu leplz kc-kznḡ,” nzmu tr̄krl̄zkiu kx nzrkcm̄nznḡr ngi alwx. ☆

* **7:4** Nigu kxnzrl̄xnḡiting tr̄mnclzpepwzkuu mz zmatq ngr Loukxtr mz da lcde seng tq: 1) Rbl̄xbz mz Loukxtr nzatalz-kr̄de nigu, murde tr̄mnclzpepwzkuu mz zmatq ngr alwx. 2) Rbl̄xbz mz Loukxtr nzbatr-krm̄le nzn̄ngi-kr̄bzku nzm̄nc-rl̄ru-krm̄ Gct, murde krl̄zku kx Gct ip̄q̄pele nigu mz nzpl̄zpx-krgu alwx ngr̄gung. 3) Rbl̄xbz mz Loukxtr nzyrl̄q-krm̄le nzayr̄plapx-krdenḡ bagu, murde Gct yrl̄ql̄zpebzle nzayr̄plapxnḡr amrl̄x mz Kraes. ☆ **7:7** Nzrl̄asnḡr 20:17; Lou Kcpwz 5:21

⁸ A' mz nzxlr-krge natq lc tqkapx Gct, zmatq ngr alwx atalz-ngrde nigi nzrkcmznr-krge da kxkqlu. A' rblx nzrpinger kx leplz nzaleng alwx mzli kc trpnzng r lou mz nzpi-krbzle badr da kx ngi alwx. ☆

⁹ Mzli kc ena trkrlzkiu da kx alvztrngr Loukxtr mz alwx. A' mzli kc tqmcpe-ngrge natq lc tqkapx Gct mz nzrkcmzngr, sc tqkrlz-ateki kx aleki alwx x mnc-rlrubzki mz Gct.

¹⁰⁻¹¹ Mzli lcde, mz nztwz-kai-krge natq kcng tqkapx Gct, zmatq ngr alwx mz nabzgi esabrtile nigi. X rpimle bagi kx sa nalu-aloki mz nzvz-nqblq-zvz-krge natq lcng. A' zmatq ngrde xprr x atalzle nigi, x sc tqtaopeki mz alwx. A' mz nibrde, sc tqkrlz-ateki kx natq kcng tqkapx Gct trngiu lrpzki r nzlungr kxboi, murde nzaelwapx-ngrmlr bagi kx takitrde nzayrplapxng nigi mz nzamnc-rlru-ngrbz nigi mz Gct, mz nzbz-alongr.

¹²⁻¹³ ?Nike, drtwr ngrde kx natq Gct batrple nzmnc-rlru-krbzki bade? Bzkqtx pnz! Na-aoti drtwrgi dxlrbi. Kzdung mzli mz nzobq-krge otppx. A' mzli kc tqayabeti-ngrgile mz dapunc, aelwapx-ngrde kx lue lc ngangrtx zlwz. Trngiu dapunc kc tqblqki, a' lue esz'-krde. Natq kc tqkapx Gct apule dapunc lc mz nzaelwapx-krde alwx kc tqyc-kapq mz nabzgi mzli kc zmatq ngr alwx lc tqatao-ngrde nigi mz alwx. Trngiu natq Gct kc tqtrka, a' alwx kcng tqtrka zlwz mz nzobq-krde. Delc Lou sc Gct tr x natq amrlx kcng tqkapx Gct nztrng, nztubqng, x nzmrlzvxng.

Nike Kxnzrlxngiting Tztao-ngrdr Mou Mz Alwx

☆ 7:8 Rom 5:13, 20

14 Kxmule-esz' krlzki kx Lou sc Gct mrlz murde vzpxm mz Mqngrde, a' mzli ka mncbeki mz nrkrdrdqgi, mnclzbepzki mz lrpzki kc pnz tqikztiki mz nzale-zvz-krgi alwx. Murde nrkrdrdqgi x nargi tr-rblxpwzu badr nztwz-ani-moukrdr alwx lcng tqale-zvzki mzli kc.

15 X mzli kang kqlu aleki da, a' trkrlzkiu nike tqaletiking. Mz drtwrgi mrlzm bagi nzalengr da kxmrlz, a' ale-alzuki alwx kc tqpxtxpx-ngrgi.

16 Glxki kx aleki alwx. X drtwrgi kc tqxpepxpe Jiszs esz'ti mz nike pi Lou sc Gct kx krlc alwx. Da lc aelwapx-ngrde kx lxngitiki nzmrlzkr Loukxtr.

17 Mz nzmu-krde lcde, nzale-krgi alwx trvzpxpuu mz nike pnz drtwrgi mz nigi esz'-krgi, a' vzpxm mz nzvz-nqblqbe-krgi lrpzki kc pnz tqikztiki mz nzale-zvz-krgi alwx mzli kc.

18 X drtwrgi esz'timi drtwr Gct kx alwx lcng nzvzpxmqng mz lrpzki lc tqikzti-pnzki ngi da kxdrka'ngr. Murde suti zlwz drtwrgi nzale-krgi da kxtubq, a' rblxm bagi nzale-krgileng mz nzxplr-krgi esz'-krgi.

19 Mzli kc nasutingr drtwrgi nzalengr da kxmrlz, trale-zvzkiung. Murde kxmule-esz' suti drtwrgi nztu-amqngi-krgi, a' kzdung mzli sc tqtaobeki mz nzatalzng.

20 Mz nzmu-krde lcde, nou alwx nrgi lcng tqpxtxpx-ngrgi trngiu drtwrgi kc tqxpepxpe Jiszs, a' nzvzpxbepqng mz lrpzki lc tqikzti-pnzki.

21 Mzli ka krlzpeki nqm q lc. Mzli lcpwz tqsutingr drtwrgi nzalengr da kxmrlz, lrpzki kc pnz tqikztiki mz nzale-zvz-krgi alwx apumle bagi zmyo rgi kx vz-nqblq-zvzle nigi drlve ke vzkiki. X rpile na-ataole nigi mz alwx.

²² Kxmule-esz', a' yclzm mz nabzgi, abrtzlvzki Loukxtr.

²³ X mzli lcpwz krlz-kzki kx nqm̄q kxdrka'ngr wzbep mz nrkrdr̄tq̄gi x nargi mz nzatr̄kati-kr̄de da kxmrlz kx suti dr̄twrgi na-aleki. X krlz-kzki kx mnclzbepzki mz nqm̄q ngr alwx mz lrpzki lc tqikzti-pnzki.

²⁴ Delc tq̄trka-zlwzpe-ngr̄gi! ?Rkrlz d̄q kx na-arlapxle nigi mz zmat̄q lc tq̄trka tq̄vz̄mile nigi mz nzbz̄ngr?

²⁵ Eu! X awi-ngr̄bzki mz Gct kx Kxetu r̄gi Jiszs Kxnzm̄cp̄x sc tq̄arlapx̄pele nigi murde nakrlzki nzesabl̄q̄ti-kr̄gi nqm̄q ngr alwx lc tq̄yc̄bep mz nrkrdr̄tq̄gi x nargi!

Mz nzmu-kr̄de lcde, mzli kcpwz tq̄mnclz-ngr̄bzki mz Gct mz nabzgi x dr̄twrgi, mnclz-kzpzki mz lrpzki r alwx kc tqikzti-pnzki.

8

Doa Neng Gct Nzvz-nq̄bl̄qlr Mq̄ngr̄kxtr

¹ Mz da kcn̄g amrlx tq̄pipebo, nakrlzamu kx mzli ka tr̄pengr nztwz-kr̄gu nzayr̄plap̄xkr Gct nigu mz nzvz-r̄br-kr̄gung, murde sc tzaxv̄ctr̄pe-bzku mz Mevalu Jiszs.

² X mz nzaxv̄ctr̄pe-kr̄bzku bade, zmat̄q ngr Mq̄ngr̄kxtr alule m̄q̄ngr̄gu x arlapxle nigu murde tr̄mnclz̄pepwzkuu mz zmat̄q ngr alwx x nzbz̄ngr.

³ Murde tr̄pnz̄ngr sc̄gu zmat̄q ngr nzarlap̄x-lzb̄q-kr̄gu mz nzvz-nq̄bl̄q-zvz-kr̄gu Loukxtr, murde mzli kc mnclzbzku mz zmat̄q ngr alwx. Mz nzmu-kr̄de lcde, Gct esz'-kr̄de sc tq̄arlap̄x̄pele nigu, mz nzatwz̄lr-kr̄mle Mrl̄x̄de angidr̄ mz

nznngini-krde leplz da kc tqwaiku. Murde nangi blz kx takitrde nzxpepxngr alwx ngrgu, nigu leplz. Dekc Gct tqarlapx-ngrde nigu leplz murde trmnclzpepwzkuu mz zmatq ngr alwx.

⁴ Arlapxpele nigu murde ma tqvz-nqblqbeku nqmq ngr alwx lc, a' navz-nqblq-alzuku Mqn-grkxtr kc tqokatrle nigu mz nzvz-nqblq-krgru natq Gct mz nzmncngr kxtubq.

⁵ Kxtrnzrlxngitiung kcng tzvz-nqblqlr nqmq ngr alwx kc tqycpxm mz nabzdr, nzaoti zvz drtwrdr nzalengr alwx lcng. A' kxnrzrlxngiting kcng tzvz-nqblqlr Mqngrkxtr, nzvqti drtqdr da kx na-abrtzlvz-ngrde nidr.

⁶ Nzmu nzaokr drtwr leplz nayclzbzlr mz nqmq ngr alwx, sa navz-nqblqlr lrpzki kc tqtutr mz nzbz-alongr. A' nzmu nzaokr drtwr leplz navz-nqblq-zvzlr me pnz drtwr Mqngrkxtr, sa narmctilr nzlungr kxboi x namncng badr Gct mz nrw.

⁷ X leplz kcng nzao-krdr drtwrdr tqyctrpz mz nqmq ngr alwx, nidr enqmi r Gct, murde nzpptxpx-ngrdr nzvz-nqblq-krdr Loukxtr, x mou rblx-zlwzbz badr nzale-krdrle.

⁸ X leplz lcng tzmnczlbzng mz zmatq ngr alwx, rblx-kzpz badr nzabrtzlvzkr Gct nidr.

⁹ A' nzao-krmu drtwrmu tryctrpepwzu mz zmatq ngr alwx, murde Mqngrkxtr mncpxm mz nabzmu, x mnclzbzmu bade. A' krkcng nabzdr trmnctx-ngrpqu Mqngrkxtr kc tqkabz Kraes, trnginidru leplz nedeng.

¹⁰ A' nimu, leplz nedeng. Murde kxmule-esz' nrkrdrtqmu nabzng kalr murde alwx ngrmung,

a' mqngrmu nzlupeng x nztubqpeng mz nzobqkr Gct murde Kraes mncpxm bamu mz Mqngrkxtr.

¹¹ A' Gct kc tqatulzmle Jiszs mz nzbzngr, mz nqmq lcpwz sa na-alu-mople nrkrdrtqmu mz zmatq ngr Mqngrkxtr kc tqkabzle mz nzmncpx-krmle bamu.

¹² Mzlengeng x inwengeng, da kxmrlzting kcng tzvzpxmqng mz Mqngrkxtr drtwr ngrde kx navz zvz nzvz-nqblq-krqu da kx pimle bagu. X trpnzngr da kx batrple bagu nzvz-nqblq-krqu lrpzki kc pnz tqikztiku mz nzale-zvz-krqu alwx.

¹³ Murde krkc tqvz-nqblq-zvzle lrpzki lc, sa nabz alo. A' mz nzrlr-krbzmu zmatq ngr Mqn-grkxtr nzokatr-krde nimu, krlzamu nzesablqti-krmu lrpzki lc tqmrlz-zlwzbx mz nrkrdrtqmu x narmu. X mz nzale-krmu da lc, sa naprtramu mz nzlungr kxboi.

¹⁴ Murde leplz amrlx kcng tzvz-nqblqlr Mqn-grkxtr kc tqkabz Gct, nidr doa nedeng.

¹⁵ X Mqngrkxtr kc tqkamle bagu, trapusr-ngrdeu nigu kxnzawz-nrbalqng kcng tzmwxlr-ngrdr nide mz nzayrplapx-krde nidr. A' mz nzka-krmle bagu Mqngrkxtr, nginipegu doa nedeng, x Mqngrkxtr pi-zvzmle bagu kx Gct suti zlwz drtwrde nzrpi-krbzku bade kx, "Trte."

¹⁶ X Mqngrkxtr aopx-angidrmle bagu mz mqn-grgung x nabzgung kx nigu doa neng Gct.

¹⁷ Delc, mz nznginipe-krqu lc doa nedeng, sa naprtrku mz dztudeng amrlx. X sa naprtr-kzku mz da amrlx kcng tqkabz Gct mz Mrlxde Kraes. Murde nzmu na-axvctrpzku bade mz nzetqkr drtqde, sa naprtr-kzpzku bade mz nzmyalz-krde.

Nzprtr-krgru Mz Nzmyalzkr Gct X Nzamatqngr Nide Heven

¹⁸ Mz drtwrnge, nzetukr da amrlx keng tqm-rlz tqluli tqkqlu nakam Gct bagu Heven kalr nzmyaszpx-zlwzlr nztowpuzkr nzetqkr drtqgu kx-pipz mzli kxmrbcne tqmncku mz nrlc ka.

¹⁹ Da amrlx keng tqwzngr Gct nzobqtixlr mzli kc Gct na-aelwapx-ngrde nzmrluekr leplz nedeng.

²⁰ Murde Gct yrqlzble dalr nrlc atwrnrngr mz zmatq ngr zmibi x nzbzng vzxpm mz alwx kc tqale Adzm.

²¹ A' pnzpe kai drtwrde kx mz Mzli Kxmatq kc nayzlu-ngrm Jisz, sa na-arlapxe doa nedeng x nakazle badr nzmnc-zpwxngr. X mzli lcpwz, sa na-arlapx-kzle dalr nrlc atwrnrngr keng tzy-clzbzng mz zmatq ngr zmibi x nzbzng, murde nayc-zpwx-kzng.

²² Mz nzmu-krde lcde, krlzpeku kx abzo mzli kc tqalengr Adzm alwx krlzmle mzli ka, dalr nrlc amrlx sc tqvzbe nzmibi-krdr x nzbz-krdr. X nzetqkr drtqdr apule zvetq ngr drtq olvz kx narmika.

²³ A' nigu kz, apuku olvz lc, kxmule-esz' Mqn-grkxtr mncpxm mz nabzgu mz nzngini-krde da ayrnrngr mz da keng amrlx nakam Gct bagu. Murde nabzgu yrnibu kz mz nzaenzli-krgru Gct nzarlapx-krde nigu mz nzetqkr drtqgu x nzota-krgru badr zmatq ngr alwx mz nrlc ka. Aenz-liku Gct nzka-krmle bagu nrkrdrtqgu kxmrna x nzvzmi-krde nigu Heven mz nzngini-zpwx-krgru doa nedeng.

²⁴ Abzo mzli kc Gct tqarlapx-ngrde nigu, obqtipx-zvzku nztwz-krngu da lcng. Murde nzmz natwzpeku da lcng, e trna-aenzlipekuu. Trpnzngr kx obqtipxle da kx twzpele.

²⁵ A' obqtipxku da kcng trtwzkaku. X aenzliku mz drtwrgu kx br kx sa natwzkung kalr.

Mqngrkxtr Okatrle Nigu Mz Nzkrka'-krngu

²⁶ X Mqngrkxtr okatr-kzle nigu mz nzaenzli-krngu mzli ka mz nzngrgokr nabzgu. X krka'-zvz-ngrde nigu. Murde trkrlzkuu da kx takitrde nzkrka'ti-krngule, x rblx nzmcti-krngu natq mz nzpipx-krbzku da kx yclzm mz nabzgu.

²⁷ A' Gct Trte kc tqobqplxle nabzgu x drtwrgu, krlz-kzle drtwr ngr nzkrka'kr Mqngrkxtr nigu, murde Mqngrkxtr vz-nqblq-tpwzle me pnz drtwr Trte mz nzkrka'-krde leplz nedeng.

Da Kx Suti Drtwr Gct Nartrngztimle Bagu

²⁸ Gct kqlele nigu mz nznngini-krngu leplz nedeng, mz nzvz-nqblq-krde drtwr kx yrlq-pnzle. Delc kxmule-esz' da kx prtzm bagu, nakrlzku kx Gct yrlqle drtwr lc mz nzamrlz-krde nigu kcng tzmrlztilr nide.

²⁹ X mcpx pnz kz Gct nigu, x sc tqwz-ate-ngrde nrlc. Murde krlz-pnz-kaile kx sa nalxngitiku Mrlxde. X yrlqle drtwr kx na-apupwzku Mrlxde mz nqm qrgung, murde Mrlxde nangi doa kc kai x nanginigu doa kxnztopwzbzng bade. ✧

³⁰ X nigu lcng na-apuku Mrlxde, kqle-kzle nigu mz nznngini-krngu doa nedeng. X nigu lcng tqkqleleng, atubqti-kzle nigu mz nzobq-krde. X

✧ **8:29** Aposol 26:23; 1 Korint 15:20; Kolosia 1:18; Hibru 1:6

nigu lcong tqatubqtipeleng, sa tqbatrple nzaxvctr-krbzku mz nzmyalzkr Mrlxde.

Gct Tu Mz Nibrgu X Nivz Lrde Tu-ngalelvzle Nigu

³¹ Mz nzmc-krngu da amrlx lcong tqalem Gct bagu, nakrlz-kzku kx trpnzngr kx na-aovxiole nigu murde tu-zvzle mz nibrgu.

³² X krlz-angidrku kx sa naka-kzple bagu da amrlx kcng tqpimle, murde trlolvzleu Mrlxde kc esz'txu, a' atwzlr-ngrmle nide mz nztekqtr-krde nigu amrlx mz nzbzngr.

³³ X trpnzngr kx narpibzle mz Gct kx kzdq nigu leplz kcng tqmcpzle vz-rbrpe, murde nide esz'-krde kc tqatubqtipele nigu mz nzobq-krde. *

³⁴ Mz nzmukrde lcde, trpnzngr kx narpile kx takitrde nzayrplapxnggr nigu mz alwx rgung. Murde Jiszs Kxnmcpz bzpe-ngrde nzxpepx-krde nigu mz alwx lcong. X da kx myapxbz, Gct Trtede atulz-mople nide mz nzbzngr x awxbule nide me matq-esz'ngr Heven, mrkc tqpi-ngrbzle mz Trtede kx nede nigu.

³⁵⁻³⁶ A' kzdung mzli da prtm bagu, da kc tqwai nzrlwx-krigule mz Nzryrngrkxtr, mz nzrpikr

* **8:33** Kzdung mzli mz nzaotikr drtwrgu alwx rgung, nabzgu talvzo murde mwz mz drtwrgu rblxbz mz Gct nzmrlzti-krde nigu. A' drtwr lc ngi nzwzkr Setzn mz nzatrkatikrde nzrlxngiti-krngu. Mz nzplzpxpe-krbzku alwx rgung mz Gct x mz nztekqtrpe-krngu nqmz nr drtwrgu murde navz-nqblq-mouku nide, nakrlz-zpwxku kx ipqpe Gct nigu x tubqpe-mouku mz nzobq-krde. 1 Jon 1:9 Mzli kznike nabzgu talvzo-ngrde, naglqlzku Gct x na-awi-ngrbzku bade nivz lrde mz nzyckr drtwrde nigu. Murde nzrglqlzngr Gct krlzle nzaovxio-krde nzwzkr Setzn. Sam 8:2

kzdzq Sam kx, “Gct, mz nzngini-krgr doa nemqng, vz zvz nznibqti-krdr nigr; mz nzapusr-krdr nigr sip kcng tzmnc-nabung mz nznribqngr nidr.” ✧ A' nakrlzku kx trtxpnzng da kx narpwa'-ngrde nivz lr Kraes mz nzkrz-krmlle nigu. Trngiu nzxpxng, x zmwzlx, x nzetqkr drtq, x dzbi, x trnzrngisc-ngru da, x nzatrkatng, x nzotang, x kxmu-kzle-esz' nzbzng. Trtxpnzng kz.

³⁷ Kxmule-esz' da lcng amrlx nzpztmqng bagu, a' sa na-aovxio-zvzkung mz nzokatrkr Kraes kc tqmrlztile nigu.

³⁸⁻³⁹ Murde lxngiti-angidrx kx trpnzng doa x da kx na-aovxiole nivz lrde. Kxmule-esz' nzlungr o nzbzng, a' xngi-zvzpebzku nivz lrde. Kxmule-esz' kxnmncng mzlilxl kxnxplrng x kxnmzmqng, a' trnzkrzlr nzodati-krdr nivz lc. Kxmule-esz' da kx prtz mzli ka o mzli lc navzm, a' nivz lrde tqyc tqyc. Kxmule-esz' lr Heven, o lr Hxl, o doa x da kznikeng kz wzng Gct, a' nivz lrde talvzpxle da amrlx. Trtxpnzng doa o da kx na-aovxiole nivz lr Gct kc tqrmctiku mz Kxetu rgu, Mevalu Jiszs.

9

Lr Jiu Kx Nzpxtpx-ngrdr Jiszs

¹⁻² Mzli kang kqlu drtqng etq zlwz x drtwrnge vztz-ngrde kxnginingeng, lr Jiu, mz nzpxtpx-krdr Kraes. Pibo da lc bamu x krlzamu kx ngi da angidr murde nede ninge Kraes. X Mqngkxtr ncdz nzaokrng drtwrnge, nzpimlr mz nabzng kx trpokiawxu.

✧ **8:35-36** Sam 44:22

³ Lr Jiu kxkqlu trnzlxngitilru Jiszs nzngini-krde Mevalu Kxnmcpx. A' suti zlwz drtwrnge nzokatr-krnge nidr mz nzteqtr-krdr nqm̄q nr drtwrdr, murde nidr kxnginingeng x nqvi kr bangeng. Kxmule-esz' rblx, a' da kx aoti txpwz drtwrnge nide sele—nzayrplapxkr Gct ninge x nalakitxpxmle ninge mz Kraes, nzmu da lc kx tqkrlzle nzokatr-krde lr Jiu lcng mz nzesotr-krbzlr mou mz Gct. A' trtingr.

⁴ Sc tqmcp-xpnzng Gct lr Israel mz nzngini-krdr doa nedeng. Mrkc lzke nzmclr rkx ngr nzmyalz-krde x yrlq̄bzle Nzesz'tikr Drtwrdr badr, x kabzle Loukxtr badr mz Newz Saenae. Alvztr-ngrde nidr kxnamu nzangio-angidr-krdr nide x esalz-ngrbzle badr da kcng tqmyapxbz mz nzvz-krm Kxnmcpx. ✨

⁵ Melrmqdrng nidr ncblo kxnzetu neng Gct kcng bqnc, x Kraes nzmika kz apule leplz mz nqvi lr ncblo lcdeng. A' nide kc tqmyaszpxle doa x da amrlx. Naglqlz-zvz-ngrgu Gct! Angida!

⁶ Bzkq rpianu kx Gct tratutrleu nzesalz-krbzle badr. Murde trngiu leplz amrlx kcng nzmika mz nqvi lr Israel kcng tqmcp-x Gct.

⁷ X trngiu leplz amrlz mz nqvi lr Ebraam kx nznginidr leplz neng Gct. Murde rpibz Gct mz Ebraam kx, "*Nqvi lr ncblo nem angidr nayzuo mz mrlxm Aesak.*" ✨

⁸ Drtwr ngrde nznginikr leplz doa neng Gct trvzpxpuu mz nzngini-krdr nqvi lr Ebraam. Murde leplz amrlx kcng tzlxngitilr Gct, da kc tqwai Ebraam, nidr angidr doa ngr nqvi lrde.

✨ **9:4** Nou 9:8-9; 17:2; Nzrlaszng 24:8; Josua 8:33; 2 Samwel 23:5

✨ **9:7** Nou 21:12

9 Natq lcng tgesalz-ngrbz Gct mz Ebraam kx, *“Mzli kapwz, mz yiz lc navzm, sa nabatrpo mz Sera nzkrlyz-krde nzmika-krde mrlxde.”* ✧

10 Kxmu-kzle lc mz Rebeka kc mrlxde tzlipxmqng, trtedr esz', krlc melrmqgu Aesak.

11-12 Kxmule-esz' mztr trnzmcka x trnzalekalr da kxmrlz o da kxtrka, a' rpibz Gct mz Rebeka kx, *“Mrlxm kxetu sa nawztrpz mz mzlede kxtpowz.”*

✧ Gct pile da lc mz nzaelwapx-krde kx nzmcpix-krde leplz trtuou mz da kx nzalelr, a' tuo mz drtwr kx yrlq-pnzle.

13 Da kc tqwai nzpikr Gct le mz Nzryrngrkxtr kx, *“Mrlztix Jekop, a' pxtxpx-ngrne Isc.”* ✧

14 ?Nike, napiku kx Gct vz-rbr mz nzale-krde da lc? Bzkqtx pnz! Murde Gct tubq zvz.

15 X rpibzle mz Mosis kx, *“Sa naycngr drtwrnge doa kx pnz drtwrnge. X sa naokatrix doa kx pnz drtwrnge.”* ✧

16 Mz nzmu-krde lcde, Gct sa namcpxle krkcng natwzlr da kx esalz-ngrde. X nzmcpix-krde leplz tryctru mz nzrsutikr drtwrdr o mz nzale-krdr da, a' mz nzryckr drtwrde nidr.

17 Na-aoti kz drtwrgu King r Ijpt. Murde Nzryrngrkxtr alvztr-ngrde kx Gct rpibzle bade kx, *“Yrlqx nim mz nzngini-krm king, murde naovxiox nim mz zmatq rnge x nrpa rnge natalvzole nrlc.”* ✧

18 Mz nzmu-krde lcde, opx angidr kx Gct ycngr drtwrde kzdung leplz, mz nzvz-nqblq-krde me pnz drtwrde. X batr-kzpzle nzmqngikr nar kzdu-

✧ 9:9 Nou 18:10, 14 ✧ 9:11-12 Nou 25:23 ✧ 9:13 Malakai 1:2-3

✧ 9:15 Nzrlaszng 33:19 ✧ 9:17 Nzrlaszng 9:16

kzng leplz, vz-nqblq-kzle me pnz drtwrde. *

¹⁹ Mwx kzdung leplz sa narpimlr bange kx, “Leplz lcng nzale-txpwzlr da kc tqbatrpz Gct badr nzale-krdr le. X rblxbz badr nzvecpx-lzbq-krmlr mz zmatq ngr me pnz drtwrde. ?A' nike Gct tqayrplapx-ngrde leplz kcng trnzlaltqp-wzung bade?”

²⁰ A' sa na-ayzlu-ngrbo natqdr kx, “Bzkq kxmu nzvea-krmu lc.” Murde nimu leplz, x trtakitrdeu leplz nzymnetitr-krdr Kxrpalz kc tqwz-ngrde nidr. Murde ma nyz ncblo tr-rpipwzleu mz ncblo kc tqwz-ngrde nide kx, “?Nike tqmu nzwz-krm ninge lc?”

²¹ Murde ncblo kx rwzngr ma, takitrde nzvz-nqblq-krde me pnz drtwrde esz'-krde. Krlzle nzwzngr ma kx li, kzdq kxnmwinger, x kzdq kxnzasungr dakxnzng.

²²⁻²³ Kxmu-kzle lc mz Gct. Murde kxmule-esz' takitrde nzayrplapx-krde kxnzaleng alwx mz zngya ngr drtwrde, a' rlr-ngrbzle badr nzm-ncbengr mz nrlc mzli ka x trayrkrpx-anileu nrlc. Murde na-aelwapx-kai-ngrbzle nzyckr drtwrde x rkx ngr nzmyalz-krde mz leplz kcng mztr trnzmcka, tqmcp-pnzleng, x sc tqayrplapx-atele kxnzaleng alwx.

* **9:18** 9:7 Kzdung doa neng Ebraam nzvzpx-kzpqng mz mrlxde Ismael, mrlx Haga. A' doa lcng trnzatutrlru da kc tgesalz-ngrbz Gct mz Ebraam, x trnginidru leplz kcng tqmcpxle. [Nou dckrlzdeng 15—18, 21] 9:13 Isc x Jekop nzlipxmqng, x Isc nide kc nzmika kai. 9:17 Mzli kang kqlu King r Ijijt, narde mqngi. [Nzrlaszng 7:22; 8:15, 32] Zbz sc tqbatrpebz Gct nzmqngi-zvzkr narde. [Nzrlaszng 9:12, 35; 10:27; 11:10]

24 Alemle da lc bagu, nigu kcng tqkqleleng, kxmule-esz' nigu lr Jiu o kxtrngiulrJiu.

25 Da kc tqwai nzpikr profet Hosia le mz Nzryrngrkxtr kx, *“Leplz kcng trngiu leplz nengeng mzli kc, sa narpibo badr mzli ka leplz nengeng. X leplz kcng trnzprtr-pnzung mz nivz lrnge mzli kc, sa narpibo badr mzli ka kx mrlzti-zlwzpxng nidr.”* ✧

26 *“X mrkc tqrpi-ngrbo badr kx, ‘Trnginipwx-muu leplz nengeng,’ mrlcdepwz dekc narpi-ngr-mopwc’ badr kx, ‘Nimu doa neng Mevalu Gct.’ ”* ✧

27 A' profet Asaea ycmnetr-ngrde Israel, rpile kx, *“Kxmule-esz' leplz ngr Israel nzkqlu-krdr apule drta' ngr prla, a' kxpipz txpwz delang narlapxng.*

28 *Murde ycpwz pipz Yawe sa na-atutrle nzayrplapx-krde leplz amrlx mrka mz nrlc.”* ✧

29 X Asaea ycmnetr-mou-ngrde da lc, rpile kx, *“Nzmu Yawe trnarlrpx-ngrdeu bagu kzdung doa negung kxnzpipzng, e nigu lr Israel milxtxopeleng, da kc tqwaisr-ngrde lr Sodom x lr Gomora.”* ✧

Lr Jiu Trnzrlxngitiung

30 Drtwr ngr da lcng tqpibo bamu kxmule se. Leplz kcng trngiulrJiu nztubqng mz nzobqkr Gct murde nzbtri drtwrdr Kraes, kxmule-esz' mzli kc trnzabzlru nzvz-nqblq-krdr Loukxtr.

31 A' lr Israel kcng tzabz-zlwzlr nzrvz-nqblqngr Loukxtr murde natubqbnzng mz nzobqkr Gct, trnzyatrpwzung mz nzkriz-krbzlr bz lc.

✧ 9:25 Hosia 2:23; 1 Pita 2:10 ✧ 9:26 Hosia 1:10 ✧ 9:28 Asaea 10:22-23 ✧ 9:29 Asaea 1:9; Nou 19

32 ? Nike trnzyatr-ngrpwzlru? Trnzyatr-ngrpwzlru murde trnzabzlru nzkrly-krbzlr bz mz nzbtrtkr drtwrdr da kc tqesalz-ngrbz Gct badr. A' nzabz-alzulr nzkrly-krbzlr bz mz nzvz-nqblq-krdr natq amrlx kcng tzyrong mz Loukxtr mz nzxplr-krdr esz'-krdr. X mz nzpctxpx-krdr lrpzki r nzarlaxngr kc tqyrlq Gct, nztaong mz nou rplz kc tzyrputrngr leplz. †

33 Da kc tqwai nzpikr Gct le mz Nzryrngrkxtr kx, *"Obqamamu! Murde yrlqplex kc doa mrkc Jerusalem kx apule rplz kx nayrputrngr leplz, mz nzobqszo-krdr nide. X nide nou rplz kc tzpctxpx-ngrdr: Kxmule-esz', a' doa kx lxngitile nide drtqde trnamyau mz nzbtrtkr drtwrde nide."* ☆

10

1 Mzlangeng x inwengeng, krka'-ngrbo mz Gct kx lr Jiu amrlx narlapxng, murde ngi da kx pqtx zlwz mz drtwrge.

2 Krlz-angidrx kx nzabz-zlwzlr nzvz-nqblq-krdr Gct, a' trnzkrlylru kxnamu nzvz-nqblq-krdr le.

3 Trnzkrlylru kxmu nzatubqtikr Gct leplz mz nzobq-krde. A' mz drtwrdr, nztubq-krdr navzpxm mz da kx nzyrlqlr esz'-krdr, mz nzvz-nqblq-krdr Loukxtr. X nzpctxpx-ngrdr nzmncly-krbzlr mz lrpzki r Gct mz nzatubqti-krde leplz kcng tzlxngitilr Kraes.

† 9:32 Mz drtwr lr Jiu, rblx nzbzkr Mevalu Kxnmcpx. Mzli kc tzxlr-ngrdr kx Kraes bz-ngrde nidr, nzpctxpx-ngrdr drtwr lc. X mz nzmu-krde lcde, nztaong mz nou rplz, kc tqngi Kraes esz'-krde. ☆ 9:33 Asaea 8:14; 28:16; 1 Pita 2:7-8

⁴ Kc tqatutrpele bz ngr Loukxtr. X mz nztubq-krde mz nzvz-nqblq-angidr-krdele, leplz amrlx kcng tzlxngitilr nide nzkrzlzr nzprtr-kz-krdr mz nztubq-krde mz nzobqkr Gct.

⁵ Mosis yrole kxmu leplz natubq-ngrdr mz nzobqkr Gct mz nzvz-nqblq-krdr Loukxtr. Rpile kx, “*Doa kx vz-nqblq-zvzle Loukxtr amrlx, sa nalu zvz.*” ✧

⁶ X mou, Nzryrngrkxtr alvztr-kzple mz nzatubqtikr Gct leplz mz nzlxngiti-krdr Kraes, mz nzrpi-krde kx, “*Bzkq rpi drtwrm kx navzdqq Heven,*” (mz nzvzmio-krme Kraes mz nztwz-krmle nrpa ngr nzrlapxngr).

⁷ “*X bzkq rpi kz drtwrm kx navzoq la,*” (mz nzatulz-krme Kraes mz nzbzngr, mz nztwz-krmle Nrpakxmrlz).

⁸ “*Murde nrpa lc krlzpebzle nim. X ycpxpem mz nabzm x pipxpeq mz naom.*” ✧ Krlc nrpa kc tqyapwxtipxkr, kx leplz narlapxng mz nzlxngiti-krdr Kraes. X tr-rblxu nzrlapx-krdr murde Gct esz'-krde kx atwzlo-ngrmle Jiszs bagu x atulz-mople nide mz nzbzngr.

⁹ Murde doa kx naplzpxle mz naode kx, “*Jiszs nide Kxetu Kxmyalz-esz'ngr,*” x lxngiti-angidr-kzle mz nabzde kx Gct atulz-mople Jiszs mz nzbzngr, doa la sa na-arlapx.

¹⁰ Murde mz nzplzpx-krgru nzlxngiti-angidr-krgru Kraes, tubqku mz nzobqkr Gct x sa na-arlapxle nigu.

¹¹ Murde Nzryrngrkxtr ycmnetr-ngrde Mevalu mz nzrpi-krde kx, “*Doa kx lxngitile nide drtqde*

trnamyau mz nzbrtikr drtwrde nide.” ✧

¹² Kxmule-esz' lr Jiu o kxtrngiulrJiu, a' kxnzrlxngiting amrlx nzmncclzbzng mz Kxetu kcpwz, tqamrlz-zlwzle leplz amrlx kcng tzrlxtibzlr nzokatr-krde nidr.

¹³ Da kc tqwai nzpikr profet Joel le kx, *“Krkng nzrlxtibzlr mz Kxetu nzokatr-krde nidr, sa narlapxng.”* ✧

¹⁴ ?A' myx kxnamu nzrlx-krbzlr bade nzokatrngr, nzm kx trnzlxngitikalr nide? ?X myx kxnamu nzlxngiti-krdr nide, nzm kx trnzxl-rkalr nrpa ngrde? ?X myx kxnamu nzxlr-krdr Nrpakxmrlz lc, nzm kx trpnzngr leplz kx narpixbz badr?

¹⁵ ?X myx kxnamu nzrpipxkr leplz nrpa, nzm kx trpnzngr doa kx na-atwzlrpx-ngrng? Da kc tqwai nzpikr Nzryrngrkxtr le kx, *“Mrlz-esz'ngr nzvz-krm leplz kcng tzrtwzmqng nrpa kxmrlz.”* ✧

¹⁶ A' lr Jiu amrlx trtwzlr Nrpakxmrlz lc. Murde profet Asaea rpile kx, *“Yawe, trpnzngr kx lxngitile natqng.”* ✧

¹⁷ Mz nzm-krde lcde, leplz nzrlxngiting mz nzyrplatitrkr nardr Nrpakxmrlz, x nardr nzyrplatitrlr Nrpakxmrlz mz nzryapwxtipx-ngrbz badr Nrpa ngr Kraes.

¹⁸ ?A' lr Jiu nzxlrpe-kzlr Nrpakxmrlz? Eu, nzxlrpelr, da kc tqwai nzpikr Nzryrngrkxtr le kx, *“A' nrpa scdr vzpx x krlzbzle leplz amrlx mz nrlc tulvzo.”* ✧

✧ **10:11** Asaea 28:16 ✧ **10:13** Joel 2:32 ✧ **10:15** Asaea 52:7

✧ **10:16** Asaea 53:1; Jon 12:38 ✧ **10:18** Sam 19:4

19 ?A' lr Jiu nzyrplatitr nardr nrpa lc? Eu, murde Mosis alvztrpzle da kc tqpi-kaipz Gct mz lr Israel, mz nzrpi-krde kx, *“Sa na-adobu-ngrbo nimu leplz kxnzmaneng kcng trngiu lr Israel. X sa na-angyati-ngrbo drtwrmu nzamrlz-krnge leplz kcng trnzkrzlru ninge.”* ☆

20 X mz nelzde kxbr Asaea alvztrpzle natq Gct mz nzrpi-krde kx, *“Leplz kcng trnzrtangrtilru ninge, sc tzrmctipelr ninge. X aelwapx-lzbqpe-ngrbo mz krkcng trnzrlxtilru nzvz-krbo badr.*

21 A' mz zbq kalvz kqle-ngrne leplz nengeng kx *nayzlu-mopqng bange. A' vz zvz nzxpqbrlr-krdr ninge murde nardr mqngi.”* ☆

11

Gct Trlakitxpx-atwrnrleu Lr Israel

1 ?Myx kxmule, Gct pxtxpx-ngrde leplz nedeng kcng tqngi lr Jiu? Bzkqtx pnz! Murde ninge dq kz lr Jiu. X mzke' nzmc mz nqvi lr ncblo kc mz Benjamin, tqvzpxm mz Ebraam. A' Gct trpxtxpx-ngrdeu ninge.

2 X trpxtxpx-kz-ngrdeu leplz nedeng kcng tqmcpz-pnz-kaile, x nrlc kc tqwz-ate-ngrde. X krlzpeamu nike ycmnetrngr Nzryrngrkxtr mz da lc. Murde profet Elaeja drtwrde lctrpz mz lr Israel mz nzrpi-krde kx,

3 *“Yawe, nznibqtipelr profet nemqng amrlx, x nzawxtxopebzlr olta nyzmqng. Ninge kc tqmnc-txpxpepwz, x sa tzrpilr nanibq-kzlr ninge.”* ☆

☆ **10:19** Lou Kcpwz 32:21 ☆ **10:21** Asaea 65:1-2 ☆ **11:3** 1 King 19:10, 14

⁴ A' ayzlu-ngrbz Gct nzkrka'-krde kx, *"Amnc-bekapxpex leplz ngr Israel siu-rlimz (7,000) kx trnzangiolru gct Baal, murde leplz lcng nangi nengeng."* ✧

⁵ Kxmu-kzle lc mzli ka. Murde kzdu lang kz leplz kxpipz kxnzamnc-bekapxpeng kcng tqm-cpxpeng Gct mz nzarlapx-krde nidr mz zmrlz ngrde kxmyalz.

⁶ Nzmcpx-krde nidr tuo mz zmrlz ngrde kxmyalz x trtuou mz nike nzalelr. Murde nzmu namcpxle nidr mz nike nzalelr, zmrlz ngrde lc trngiu da kx ka-nrbalqle.

⁷ Krlc drtwr ngrde kx lr Israel nzabz-zlwzlr nztubq-krbzlr mz nzobqkr Gct, a' nzkqlung kx trnzyatrpwzung. A' ngi txpwz krkcng tqmcpyle kx nayatrpzng. A' batrpzle nzmqngikr nar leplz kxkqju.

⁸ Da kc tqwai nzrpikr Nzryrngrkxtr le kx, *"Gct aprcbzle badr kxmnc mzlilxlr kx akamrbr-ngrbzle nzrkrlz-krdr, vzm vzm krlzmle mzli ka, rblxbz badr nzrmcng x nzxlrng nralvztrngr angidr."* ✧

⁹⁻¹⁰ X rpi kz Devet kx, *"Yawe, kxmu nzmukr leplz lcng badr kztedrng Mangr-nzangiongr trtubqu mz nzobq-krm. Delc, nzrtxlvlz-mou-ngrdr alwx ngrdrng x takitrde nzodati-krm nidr. Akcbz mztr, x ayangrnnga-zvzbz nrkrdrtdr."* ✧

¹¹ ?Myx kxmule, mzli kc tzaongr lr Jiu mz nzpxtxpx-krdr Kraes, drtwr ngrde kx nzlakitx-pxkr Gct nidr tqyc tqyc? Bzkqtx pnz! A' arlapyle leplz kcng trngiulrJiu, mz nzlxngiti-krdr Jiszs, murde nabatrpzle nzdobuti-zlwzkr lr Israel nidr.

✧ **11:4** 1 King 19:18 ✧ **11:8** Lou Kcpwz 29:4; Asaea 6:9-10; 29:10

✧ **11:9-10** Sam 69:22-23

¹² Lr Jiu nzpxtxpx-krdr Kraes, batrpzle mz Gct nzka-alzu-krbzle da kxmrlzting mz kxtrngiulrJiu. Mz nzm-krde lcde, mz nibr lr Jiu amrlx kcng tqmcpX Gct narlapxng, sa na-amrlz mou Gct leplz amrlx mz nrlc namyaszpxle mzli ka. Murde da kxmrlzting amrlx kcng tqkaom Gct bagu, nzvzpxmqng mz nzkao-kai-krbzle ng mz lr Jiu.

¹³ Pibo da lcng amrlx bamu, myapxbz nimu kcng trngiulrJiu. Gct mcpXle ninge mz nzngini-krnge aposol mz nzalvztr-krnge kxtrngiulrJiu. X nzvz-krnge lc matq zlvz mz drtwrnge.

¹⁴ Murde mwx, sa nadobutinger lr mrnyzngeng nzarlapxkr Gct nimu, x nzvz-krnge lc sa nabatr-pzle mz kzdung nidr nzrlapx-krdr kz.

¹⁵ Mzli kc lr Jiu tzpxtxpx-ngrdr Jiszs nzngini-krde Mevalu rdr, Gct rlrpx-ngrde nzrlapxkr lr mrkzbleng amrlx mz nrlc. ?A' nike naprtz mzli kc na-abrtzlvz-ngrde nidr mzli kc nalxngitilr Jiszs kalr? Kxnzbzng sa nalu-moung. *

Lr Jiu Nznginibedr KxnzmcpXng Ne Gct

¹⁶ Na-aoti drtwrmu dalr nrlanc x dzbr nc. Murde dalr nrlanc kc tzamrlz tzka-kaipz mz Gct batrpzle nztrkr dalr nrlanc amrlx. X nzm dzbr nc natrlr, e nrladeng amrlx nztr-kzng. Mz nqmq lcpwz, lr Jiu sa nanging Gct murde melrmqdrng nidr leplz nedeng.

¹⁷ Naycmne-ebzpxbo nc olivi. Lr Jiu nzapulr nc olivi kc tqpeti Gct mz nrlanc nyzde. X lr Jiu kcng trnzrlxngitiung nzapulr nrla nounc kcng

* **11:15** Mz drtwr kzdung kxnzetung, natq lc 'kxnzbzng sa nalu-moung,' drtwr ngrde kx lr Jiu kxnzqqlung sa nalxngitilr Jiszs, x sc tqyzlu-atem.

tqlakitxpx Gct. X nimu kxtrngiulrJiu apuamu nrla nc olivi kx tutrp mz nrlarde kx yz mz nrlanc nyz Gct. A' mzli ka mz nzrlxngiti-krmu, Gct twzpele nrlade kcng tqnginimu x sc tqaxvctrpebzle nimu mz nc olivi nyzde, murde nanginimu kz leplz nedeng. X mzli ka prtrpekzamu mz da amrlx kcng tqesalz-ngrbzle mz leplz nedeng.

¹⁸ Mz nzmu-krde lcde, bzkq obqszo-ngrnamu leplz kcng tzapulr nrla nounc kx lakitxpxle. Murde dzbr nc nide kc tqalule nrla nounc, a' trngiu nrladeng kcng tzalulr dzbrdr.

¹⁹ Mwx kzdung nimu naglqpx-lzbqamu mz nzrpi-krmu kx, "A' Gct lakitxpxle nrla nc olivi angidr, murde na-axvctrpzle nigr mrkcng tzyzprpx-ngrmlr."

²⁰ Da zpwxtx. A' nrlade kcng tzlakitxpxng murde trnzrlxngitiung, x nimu kx ngipe nrla nc olivi lc murde rlxngitiamu. Mrlzvxitx, a' bzkq glqpx-lzbqamu, a' aclvetio-lzbqamu mz zmwxlr, murde ma tzlakitxpx kz nimu.

²¹ Murde nzmu Gct kx tqlakitxpxle lr Jiu kcng tqngi angidr nrla nc olivi mz trnzrlxngitikireru, e sa nalakipx-kzle nimu, nzmu trnavz-zvzu nzrlxngiti-krmu.

²² Nakrlz-angidramu kx Gct okatrlle leplz o ayrplapxle nidr. Murde sc tqayrplapxpele krkcng trnzrlxngitiung. X okatrlle nimu mz zmrlz ngrde, nzmu navz zvz nzbrtikr drtwrmu zmrlz lc. A' nzmu navecpx-lzbqamu mz nzrlxngitingr, sa nalakitxpx-kzle nimu mz nc olivi.

²³ X mz nqm q lcpwz, nzmu lr Jiu natekqtrlr nqm nr drtwrdr mz nzlxngitikireru Mrlx Gct,

sa na-axvctr-moule nidr mrkc tzyzprkipxmlr. Murde Gct rngisc zmatq ngr nzaxvctr-moungr nidr.

²⁴ Murde axvctrpzle nimu mz nc olivi kc tqpetile, kxmule-esz' nginimu nrla nc olivi kzble. Mz nzmukrde lcde, trnarblxpwzu bade kalr nzaxvctr-mou-krde lr Jiu kcng tznginidr nrla nc olivi angidr.

Lr Jiu Sa Nayzclubzng Mz Gct Mz Nzlxngiti-krdr Kraes Kalr

²⁵ Mzlengeng x inwengeng, suti drtwrnge nzkriz-krmu da angidr kc tqyc-kapq mzli kc, murde ma tqglqpx-lzbqamu. Nzmqngikr nar lr Jiu sa navz nakrlzmle mzli kc narlapxngr kxtrngiulr Jiu kxnzkqlung kcng tqmcpxng Gct. †

²⁶ Zbz lr Jiu kxnzkqlung kcng mzli lc sa narlxngiting x narlapxng. Da kc tqwai nzrpikr Nzryrn-grkxtr le kx, “*Mevalu sa naprpxm Jerusalem, x sa nakatxde nqm q kxtrka amrlx mz leplz kcng tzvzpxmqng mz nqvi lr Jekop.*”

²⁷ *X sa nayrlqkr Nzesz'tikr Drtwrdr badr, mzli kc naipqpx-ngrbo alwx ngrdr.”* ☆

²⁸ Lr Jiu kxnzkqlung nzpxtxpx-ngrdr Nrpakxmrlz. X krlc okatrle nimu, murde Gct sc tqkazvzbzle bamu da kxmrlzting. Kxmule-esz', a' lr Jiu sc tznginibedr leplz nedeng kc tqmcpxleng.

† **11:25** Mwx 'kxtrngiulr Jiu kxnzkqlung' drtwr ngrde leplz kcng na-atutr-ngrdr natq kc tqplzpx Jon mz Nzaelwapxng 5:9-10 x 7:9. Kzdung leplz kcng tzprpxmqng mz nou, natq, leplz, drtqbr, x neidu amrlx mz nrlc sa nalxngiti-kailr Kraes, x lr Jiu kxnzkqlung kc ate. Mz nibrde kzdung leplz mou sa nalxngiti-kzlr Kraes.

☆ **11:27** Asea 59:20-21; 27:9; Jeremaea 31:33-34

X mrlzti-zlwzle nidr murde da kcng tqesalz-ngrbzle mz melrmqdrng.

²⁹ X trtekqtrleu drtwrde mz leplz kcng tqkqleleng tqamrlzleng.

³⁰ Mzli kc, nimu kcng trngiulrJiu xpqbrlr-ngrnamu Gct. A' mzli kc lr Jiu trnzrlr-ngrpwzlrz mz Gct nzokatr-krde nidr x nzyckr drtwrde nidr, okatr-alzule nimu x yc mz drtwrde nimu.

³¹ X mzli ka lr Jiu nzxpqbrlr-ngrdr Gct. X krlc Gct naokatr-kzle nidr x naycngr drtwrde nidr, da kc tqwaisr-ngrde nimu.

³² Murde amnczbzle leplz amrlx mz zmatq ngr nzxpqbrlrngr mz nzapu-krdr kxnmncng mz presin. Mz nzmukrde lcde, krlzle nzokatr-krde nidr x nzyckr mz drtwrde nidr amrlx.

Nabz Ngr Nzrglqlzngr Gct

³³ Kctitxpx-zlwzx nzetukr
Nzyrplapxkr Gct x nzkrlz-krde.
Trpnzngr kx narde nayrplatrpz
Mz da kc tqaolvzle x nqm q krdeng.

³⁴ Natq Gct rpile kx, "Trpnzngr
Kx rkrlz me pnz drtwr Yawe,
O kx rkrlz nzokatr-krde Gct
Mz da kznike kx pibzle bade." ☆

³⁵⁻³⁶ "Trpnzngr kx rkabz da mz Gct
Murde na-ayzlu-mopwz Gct bade." ☆
Murde wz-ngrde nrlc atwrnrngr,
Mz nzvz-nqblq-krde me pnz drtwrde.

☆ **11:34** Asea 40:13-14 ☆ **11:35-36** Job 35:7; 41:11

X da amrlx lolvz lxblr zvz
 Zmatq ngrde kx xplr-esz'ngr. ✧
 Naglqlzku x na-amrlue-zvzku
 Gct tqyc tqyc. Eu, angida.

12

Rlr-lzbq-ngrbzm Mz Gct

¹ Mz lengeng x inwengeng, mz nzkriz-krmu kx
 Gct ycng drtwrde leplz amrlx, lc-apqbx nimu
 nzrlr-lzbq-krbzm mz nzwztr-krbzm bade, mz
 nzapu-krmu blz kxtr kxlu. Murde krlc nzan-
 giongr angidr x aelalzmle drtwrde. ✧

² Bzkq rlr-lzbq-ngrbzm mz nzvz-nqblq-krmu
 nqm q kr lr nrlc, x bzkq drtwrmu esz'ti badr.
 A' rlr-ngrbzm mz Gct nztekqtr-krbzle nqm q nr
 drtwrmu, murde navz-nqblq-alzuamu me pnz
 drtwrde. X mz nzale-krmu da lc, nakrlz-zvzamu
 me pnz drtwrde. Krlc da kx mrlzbz bade, aelalz-
 ngrmle drtwrde, x tubq mz nzobq-krde. *

³ Mz nznngini-krnge aposol, rngidrlvz-ngrbo mz
 doa kxes' mz nimu, kx bzkq glqpx-lzbqm. A'
 na-avzo-lzbqm mz nzkriz-angidr-krm zmatq kx
 myapxbz kc tqkabz Gct bam mz nzwztr-krbzme
 bade. Murde zmatq lc vzpxm mz nzlxngiti-krm
 Kraes.

⁴ Murde nrkrdrtm esz', a' dalr nrkrdrtm kqlu.
 X mrlcdeng nzwz-krdr bletipx-lxblrng.

⁵ Mz nqm q lcpwz, kxmule-esz' kqluku, a' mz
 nzaxvctr-krbzku mz Kraes nigu nrkrdrtm kxes'.

✧ **11:35-36** Kolosia 1:17 ✧ **12:1** Jon 4:23-24 * **12:2** Gct krizle
 nztekqtr-krde nqm q nr drtwrgu mz nzrlwx-krqu Nzryngrkxtr x
 mz nzvz-nqblq-krqu le mz nzmnc-krqu.

Doa kxesz' mz nigu apule dalr nrkrdrtdqde, kx nzmwitr-lxblrbz bade.

⁶ Gct kamle bagu zmatq kxmyapxbz kx bletipx-lxblrng mz nzwztr-krbzku bade. X zmatq lcng nzvzpxmqng mz Mqngrkxtr. Doa kxesz' mz nigu nawz zvz mz zmatq kc tqkabz Gct bade. Nzmu kx tqkabzle bam zmatq ngr nzrplzpxngr nrpa kc tqkabzle bam, plzpx nrpa lc navz-nqblqle nzetukr nzrlxngiti-krm, mzli kc tqpi-ngrbz Mqngrkxtr nzplzpx-krmle.

⁷ Nzmu kx tqkabzle bam zmatq ngr nzwztr-ngrbz mz leplz, wztrpz badr. Nzmu kx tqngi nzalvztrngr natq Gct le, alvztr leplz.

⁸ Nzmu kx tqngi dalr nzapqtr-ngrbz drtwr leplz le, apqtrpz drtwrdr. Nzmu kx tqngi zmatq ngr nzrka-ngrbz da mz leplz le, rka-nrbalqbz badr, a' bzkq pnz drtwrm nzayzlu-krbzlr le. Nzmu kx tqngi zmatq ngr nzrmailzngr le, mailz angidr leplz. X nzmu kx tqngi zmatq ngr nzrycng drtwr leplz le, okatr nidr.

⁹ Nivz lrm, nangi nivz angidr. Lovz-amqngi da kxmrlzbz mz Gct, x pxtxpxngr da kxtrka.

¹⁰ Mrlzti leplz da kc tqwaisr-ngrn doa lr ma nyzm. X amrlue kztemqng namyaszpxle nim esz'-krm.

¹¹ Nzpq-zlwzkr drtwrm mz nzwztr-krbzme mz Kxetu, naglq-zvzle nabzm.

¹² Naelalz-zvz-ngrm drtwrm nzobqtipx-krm da amrlx kcng tqesalz-ngrbz Gct bam. Tu-amqngi mz nzrlxngiti-krm mz mzli r nzkxpungr. Bzkq nzkrka'-krm esaki.

¹³ Akiamu dztumu badr leplz ne Gct kcng takitrde nzokatrngr. X abrtzlvz nzadwatr-krbz

leplz ma nyzm mz nzvz-krdr mrkzbleng.

¹⁴ Rlxtibz mz Gct nzamrlz-krde krkcng tza-trkatilr nim. Amrlz nidr, x bzkq pibqtiq nidr.

¹⁵ Prtr mz nzabrtzkr kxnzabrtzng, x mz nzvzkr drtwrdr kxnzyrning.

¹⁶ Mnc-zpwx-lxblramu. Bzkq aetu-lzbqm, a' mnc-lxblramu badr leplz x wz-lxblramu badr. X bzkq rpiq nim kxrkrlz da.

¹⁷ Bzkq ayzlubzme da kxtrka kx nzalebz leplz bam. A' ale txpwz da kxtubq mz drtwr leplz amrlx.

¹⁸ Kxmule-esz' nike nzale leplz, a' ale zvz da kx namnc-ngrnamu badr mz nrwx.

¹⁹ Nimu kztengeng, x doa kxes' mz nimu bzkq ayzlubzme da kxtrka kx nzalebz leplz bam. A' rlr-ngrbz mz Gct nzayrplapx-krde nidr mz zngya ngr drtwrde. Murde mz Nzryrnrkxtr rpi Yawe kx, *“Ninge kx na-ayrplapxle leplz. X ninge kx na-ayzlu-mopwz badr da kx nzalelr.”* ✧

²⁰ A' nim vz-nqblq alzu nike pi Nzryrnrkxtr kx, *“Nzmu doa kx mwati drtwrde nim kx tqbr-talele, rkabz nade dakxnzng. X nzmu drtwrde kc tqbrlxkzle, rkabz mqde lue. Mz nzale-krbzme da lc, sa namyangr drtqde da kc tqalebzle bam.”* ✧

²¹ Bzkq rlr-ngrbzme mz da kxtrka kx nzalebz bam nzaovxio-krde nim, murde ma tqbatrpzle bam nzayzlu-krbzmele badr. A' aovxio nzao-krm drtwrm kxtrka mz nzale-krbzme da kxmrlz badr.

13

Vz-nqblqamu Gzpman

✧ 12:19 Lou Kcpwz 32:35

✧ 12:20 Nzryrplapxngr 25:21-22

¹ Doa kxesz' mz nigu kxnzrlxngiting namn-clzbx mz zmatq ngr gzpman. Murde zmatq ngr gzpman amrlx vzom mz Gct, x yrllqle kxnzeting ngr gzpman mr nyzdrng.

² Mz nzmukrde lcde, krkcng tzxpqbrlr-ngrdr gzpman nzxpqbrlr-ngrdr Gct kc tqyrlqle gzpman lc, x sa na-ayrplapxng.

³ Krkcng tzaleng da kxtubq trnzmwxlrtilru gzpman. A' nzmwxlrtilru krkcng tzaleng da kxtrka. Nzmu kx trsutiu drtwrmu nzmwxlrtingr gzpman, e ale-txpwzmu da kxtubq, murde naglqlz-ngrdr nimu.

⁴ Murde kxnzeting mz gzpman, nidr kxnzawz neng Gct kcng tqyrlqleng mz nzokatr-krdr nimu. A' nzmukrde lcde, e mwxlrtiamu gzpman lc, murde Gct kabzle badr zmatq ngr nzayrplapxng kxnzaleng da kxtrka, kxmule-esz' nznibqlr nidr.

⁵ Mz nzmukrde lcde, namnclzbxmu mz zmatq ngr gzpman murde ma tzayrplapx nimu, x mou murde tubq nzmncz-krbxmu bade.

⁶ Delc tqxpe-ngrnamu kz takes, murde kxnzetu lcng nidr kxnzawz neng Gct mz nzale-krdr nzwzng kc tqkabzle badr.

⁷ Mz nzmukrde lcde, xpebxmu mz leplz nike takitrde nzxpe-krmu. X xpeamu takes kcng tqpi lou ngr gzpman kx naxpe. Mz nqmqlcpwz amatqamu krkcng tqtakitrde nzamatq-krmu nidr x amrlueamu krkcng tqtakitrde nzamrlue-krmu nidr.

Nzmncngr Kxtubq Mzli Ka, X Jiszs Sc Tqyzluatem

⁸ Eu. Mrlz nzxpe-krbzmu mz leplz da amrlx kcnq tqrlytibzmu badr. A' nakrlz-zpwxamu kx rblx nzxpe-krbzmu da mz Gct mz nzayzlu-krbzmu nivz lrde. Delc navz zvz nzmrlzti-lzbq-krmu. Murde nzale-krmu da lc atutrle natq amrlx kcnq tqkapx Loukxtr. ✧

⁹ Natq lcnq nzrpilr kx, *“Bzkq rmwimiq doa kx trngiu krnalzm. Bzkq rnibqq leplz. Bzkq pnaq da. Bzkq rkcmnz-ngrn,”* x kzdung kz da mou. ✧ A' natq lcnq amrlx nzaxvctr-lxblrbzng mz natq kc esz' tqrpile kx, *“Namrlztiq kztemqng da kc tqwaiq nzmrlzti-lzbq-krm.”* ✧

¹⁰ Nzmrlzti-krmu leplz drtwr ngrde kx bzkq aleamu da kx na-atrkatile nidr. Mz nzmukrde lcde, nivz ngi lrpzki nzvz-nqblqngr Loukxtr amrlx.

¹¹⁻¹² Nzmnc-krmu natubq, mz nzkrly-krmu kx ycppe pipz nyzylu-krm Jiszsz mz nzvzmi-krde nigu Heven. Mz nzmukrde lcde, bzkq amaamu, a' nawz-katopeamu mz nzwzng kx tqkabz Kxetu bamu mzli ka tqyc-ngrbepz mzli. X bzkq vz-nqblq-zvzamu da kxtrka, a' vz-nqblq-alzuamu nzalvztrngr angidr.

¹³ Mz nqm q lcpwz kx tr-rblxu nzmckrgu da ngrlx, tr-rblx-kzpwzu mz leplz nzmckrdr kx nqm q krmu tubq. Bzkq prtrpzmu mz kxnzrmnq-zvzng, kxnzyrlwr-lxblrng mz nzale-krdr alwx, kxnzrmwimi-abeaneng, kxnzaleng da kx myangr drtq, kxnzota-zvzng, x kxnzdobung, a' kapx-lzbqmamu badr.

✧ **13:8** Matiu 22:40 ✧ **13:9** Nzrlaszng 20:13-17; Lou Kcpwz 5:17-21 ✧ **13:9** Livae 19:18; Matiu 19:19; 22:39; Mak 12:31; Luk 10:27; Galesia 5:14

14 A' mz nzaxvctr-krbzmu mz Kxetu rgu Jiszs Kxnzmcpx, navz-nqblq-kzamu nqmq krde, murde leplz namclr nide mz nzmc-krdr nqmq krmu. X bzkq aoti drtwrmu nzvz-nqblq-krmu zmatq ngr alwx kc tqycpxbep mz nrkrdrtqmu.
 ☆

14

Bzkq Pikitiq Leplz Kcng Nzrlxngiti-krdr Tqngrgo

¹ Mnc-zpwxamu badr leplz kcng drtwrdr tql-itprz mz da, murde trnzkrzlru kx da kx nzalr tubqbz mz nzobqkr Gct o trtingr. X bzkq otablamu badr mz drtwr kx blepxngr mz nzaokrmu drtwrmu.

² Murde kzdung leplz nzlxngitilr kx takitrde nzmu-krdr dakxnzng amrlx. A' kzdu-kzng leplz trnzmuu ncvr animol, murde mz drtwrdr rpwa'ngr Gct x nzrlxngiti-krdr ngrgo mz nzmu-krdrle.*

³ Mrlx kx krlzle nzmungr dakxnzng amrlx bzkq obqszo-ngrde ncblo kc trmuu ncvr. X doa kx trkrzleu nzmungr ncvr, bzkq pikitile ncblo kc tqmu dakxnzng amrlx, murde tr-rpwa'-ngru Gct.

⁴ ? Nim neke kc tqkxmu nzymne-krde lc? Murde trtakitrdeu npikiti-krm kxnzawz neng

☆ **13:14** Rom 7:23 * **14:2** 14:1 Bzkq otabrku mz da kx tryctru mz Nzryrnrkxtr. X mou, bzkq otabrku mz dalr Nzryrnrkxtr kx tropxu, x drtwr lrmakxtr tresz'titru elr, da kc tqwai mz nzwrkxtrngr. A' takitrde nzatubqti-rgu leplz kcng tzaleng alwx x tzxpqbrlr-ngrdr natq Gct. 14:2 Lou sc Mosis rpwa'-ngrde nzmungr kzdung dakxnzng. A' mzli kc lr Jiu tzlxngitipe-ngrdr Jiszs, naddr tryrplatrpwzu kx mzli ka takitpede nzmu-krdr dakxnzng angidr amrlx.

Gct! Trnzwztrpwzu bam! A' Kxetu sa napibzle mz kxnzawz nedeng kx nzale-krdr da kxtubq o trtingr. Kxnzrlxngiting amrlx nidr leplz nedeng, murde okatrle nidr amrlx, kxmule-esz' nzrlxngiti-krdr mqngi o nrgo.

⁵ Mz nqmq lcpwz, kzdq ncblo mz drtwrde kzdq zbq kxes' myapxbz mz zbq amrlx. X kzdq kz ncblo mz drtwrde zbq amrlx kxmu-txpwzle esz'. Doa kxes' mz nimu nakrlz-angidrlle nikelxngitile, x navz-nqblqle mz nzmnc-krde.

⁶ Murde mrlx kx rpi drtwrde kzdq zbq kxes' myapxbz mz zbq amrlx, alebzle mz Kxetu. X krkcng tzmung dakxnzng amrlx, nzalebzlr mz Kxetu, murde nzawi-ngrbzlr bade. X leplz kx trnzmuung ncvr, nzale-kzpzlr mz Kxetu mz nzawi-krbzlr bade. Nzabrtzlvzkr Gct nidr vzpxm mz nzale-krbzlr da bade.

⁷ Mz nzaokrgu drtwrgu nigu kxnzrlxngiting, da kxmyapxbz trngiu nzamatqkr leplz nigu mzli ka mz nzlu-krgu o mzli kc nabz-nrgu.

⁸ A' da kxmyapxbz nzamatqkr leplz Gct mz nzmckrdr nqmq krgu mzli ka x mzli kc nabz-nrgu. Mz nzmu-krde lcde, kxmule-esz' luku o bzku nede nigu Kxetu rgu.

⁹ X nakrlzamu kx Kraes bz x lu-mop murde nanginide Kxetu r kxnzlubeng x kxnzbpeng.

¹⁰ Mz nzmu-krde lcde, bzq pikiq x obqszoq kztemqng. Murde mzli kc nayzlu-ngrm Jisz, sa natutrpzku amrlx nrgu mz mz Gct, mz nzpikrmle bagu kx vz-rbrku o trtingr.

¹¹ Murde mz Nzryrnrkxtr Kxetu rgu rpile kx, *“Da kc tqpibo bamu sa natutr angidr, murde ninge Yawe Gct kc tqlu alo. Leplz amrlx sa na-atuobzng*

zpr bange. x naplzpplr natq ngr nzrglqpxngr ninge.” ✧

¹² Mz nzmu-krde lcde, nigu leplz amrlx sa napipxbzku mz Gct nqm̄q krgung x da kx alekung amrlx mz nrlc ka.

¹³ Mz nzmu-krde lcde, bzkq vz zvz nzpikiti-lzbq-krmu. A' na-aoti drtwrmu kx bzkq aleamu da kx na-atrkatile nzrlxngitigr kztemung o na-ataole nidr mz alwx.

¹⁴ Mz nzaxvctr-krbo lc mz Kxetu rgu Jiszs, lxngiti-angidrx kx trpnzngr dakxnzn̄g kx traktitrdeu nzmungr mz nzobq-krde. A' nzmu mzlenge rpi drtwrde kx kzdung dakxnzn̄g traktitrdeu mz nzobqkr Gct, traktitrdeu nzngq-krdeleng. X bzkq atrkati-ngrbo nzrlxngiti-krde.

¹⁵ Nzmu nzmu-krm ncvr atrkatile nzrlxngitigr kztem x ataole nide mz alwx, e bzkq ngqnle. Murde Kraes bz-ngrde nzarlapx-krde nide. X da kx atrkatile nzrlxngitigr kztem, trvzpxpuu mz nivz.

¹⁶ Mz nzmu-krde lcde, bzkq ale-zvzq da kx mrlzbz bam esz'-krm, murde ma tqataole kztem mz alwx x sc tzpibqtipengr leplz nim.

¹⁷ Murde mz nzn̄ginigr Gct king rmu, da kx myapxbz trngiu nzmungr x nzr̄mn̄qngr. A' da kcng tqmyapxbz da lcde seleng tq: nztubqkr nzmnc-krmu mz nzobqkr Gct, nzmnc-zpwx-krmu badr kztemung kxnzrlxngiting, x nzprtr-krmu mz nzabrtzn̄gr kx vzpxm mz Mqngrkxtr.

¹⁸ Murde krkcng nawztrpzng mz Kraes mz nzvz-nq̄blq-krdr da lcdeng, sa na-abrtzlvz Gct nidr x na-amatz̄kz leplz nidr.

✧ **14:11** Asaea 45:23; Filipae 2:10-11

¹⁹ Dekc na-ale-ngrgu da kx na-amnc-zpwxle nigu x na-amqngile nzrlxngiti-krgru.

²⁰ Nzmu nzngq-krmu dakxznzng na-atrkatile da kx na-alebz Gct mz kztemung, bzkq ngqamu dakxznzng lcng. Murde dakxznzng amrlx takitrde nzmungr mz nzobq-krde. A' trtakitrdeu nzngq-krmu dakxznzng kx nabatrpzle mz kztemung nztao-krdr mz alwx.

²¹ Bzkq aleamu da kx krlzle nzbatr-krbzle mz kztemung nztao-krdr mz alwx, kxmule-esz' da kx ngqnamu o da kx mnqamu.

²² Doa kxesz' mz nimu, bzkq alvztrpzme nike lxngitiq mz da lcng mz kztemqng, murde navz-nqblq-kzlr me pnz drtwrm. A' pi txpwz nzrlxngiti-krm mz Gct. X mz nzvz-nqblq-krmle, Gct trnapipwzleu bam kx vz-rbrq, a' sa na-abrtzlvzle nim.

²³ A' doa kx drtwrde litrpz mz dakxznzng kx ngqde, alepele da kx vz-rbr. Murde trvz-nqblqleu da kxtubq mz nzobqkr Gct mz nzrlxngiti-krde. Mzli kznike doa ale-ngrde da kx atrkatile nzrlxngiti-krde sc tqalepele alwx mz nzobqkr Gct.

15

¹ Nigu kcng nzrlxngiti-krgru tqmqngi, na-aoti drtwrgu kztegunq kcng nzrlxngiti-krdr tqnrgo, mz dakxznzng x zbq kxtr lcng. X bzkq ale-tpwzku da kx na-abrtz-ngrgu esz'-krgru.

² A' mzli kc tqmnc-ngrgu badr, na-aleku da kxmrlzbz badr mz nzokatr-krgru nidr mz nza-mqngingr nzrlxngiti-krdr.

³ Murde Kraes traleleu da kx na-abrtz-ngrde esz'-krde, a' da kx abrtzngt Gct, da kc tqwai nzpikr Nzryrnrkxtr le kx, *“Natq kcng tzpikiti-ngrdr nim, yrplatr-kzpqng bange.”* ✧

⁴ Da amrlx kcng tqyclzm mz Nzryrnrkxtr, nzyro-ngrdr na-alvztrlr nigu, murde nabzgu napqtr vzv x natu-amqngi-zvzku mz nzobqtix-krgru da kcng tqesalz-ngrm Gct bagu.

⁵ Krka'-ngrbo mz Gct kc tqapqtrple nabzgu x okatrle nigu mz nztu-amqngi-krgru mz nzrlxngiti-krgru, kx sa naokatrle nimu mz nzesz'tikr drtwrmu, mz nzvz-nqblq-krmu nabzlvz r nanyc Mevalu Jisz.

⁶ Murde naodutr-lxblramu mz nabz kxes' mz nzangio-krmu Gct, kc tqngi Trte Kxetu rgu Jisz Kxnmcp. Eu, angida.

⁷ Mz nzmu-krde lcde, na-aodu-lzbqamu, da kc tqwai Kraes nzaodu-krde nimu, murde nzesz'tikr drtwrmu lc nabatrpzle mz leplz nzglqlz-krdr Gct.

⁸ Nadcp. mz drtwrmu kx Kraes vzm mz nzokatr-krde nigr lr Jiu. Suti drtwrde kx na-aelwapx-ngrde kx Gct takitrde nzbtrtikr drtwr leplz le. Murde angidatile da kcng tqesalz-ngrbzle mz melmqgrng, mz da kc tqalepele Mevalu kc Tzmcpx.

⁹ X Kxnmcp. vz-kzp murde kxtrngiulrjiu naglqlz-kzlr Gct mz nzyckr drtwrde nidr x nzokatr-krde nidr. Da lc atutrle da kc tqpi Devet mz Nzryrnrkxtr kx, *“Gct, sa naglqlzx nim mz mzlir lr drtqbrng amrlx, mz nzangrlvz-krnge nim.”* ✧

10 Rpi mou Nzryrnrgrkxtr kx, “Nimu kcng trngiulrJiu, abrtz-lxblramu badr leplz neng Gct.”
 ☆

11 X rpi-moule kx, “Glqpxamu Yawe nimu lr drtqbrng amrlx. X leplz mz nrlc tulvzo naglqlz-kzlr nide.” ☆

12 X rpi kz profet Asaea kx, “King kxmrna sa naprpxm mz nqvi lr Jesi. X na-aclevele kxtrngiulr-Jiu. X sa na-abrtrpzlr drtwrdr bade.” ☆ *

13 Gct nide nou nzobqtipx-krngu da kcng sa na-alele kalr. X krka'-ngrne kx sa nakabzle bamu nzabrtzng x nzmnc-zpwxng kcng tzvzpxmqng mz nzbtrtkr drtwrmu nide, murde nzrlxngiti-krmu naetunepx zvz mz zmatq ngr Mqngrkxtr.

14 Mzlengeng x inwengeng, krlz-angidrx kx amrlz-zvzamu leplz, x krlzpeamu da amrlx kx suti drtwr Gct nakrlzamu, x krlz-kzamu nzalvztr-lzbq-krmu.

15 A' mz nzryr-krbo lc letz, rngidrlvz-ngrbo kzdung da bamu, kx nadcpxng drtwrmu da kxmyapxbz. X alex da lc murde mz nzvz-nqblq-krde zmrlz ngrde kxmyalz, Gct atwzlr-ngrmle ninge

16 mz nzokatr-krnge nimu kxtrngiulrJiu mz nzwztr-krbo mz Mevalu Jiszs. Apux pris kc tqvectrple leplz mz Gct, mz nzyapwxtipx-krbo Nrpakxmrlz mz kxtrngiulrJiu, murde nalxngiti-kzlr Kraes x natubqng mz nzobqkr Gct, mz nzapu-krdr blz kc tqatr Mqngrkxtr.

☆ 15:10 Lou Kcpwz 32:43 ☆ 15:11 Sam 117:1 ☆ 15:12 Asaea 11:10 * 15:12 Jesi nide trte King Devet, x Jiszs Kxnzmcpz nide King kx prpxm mz nqvi lrd:

¹⁷ X mz nzaxvctr-krbo mz Mevalu Jiszsz, glqpx-lzbq-ngrne nzwztr-krbo mz Gct.

¹⁸⁻¹⁹ A' sa naycmnetxtrpo mz nike ale Kraes mz nzaxvctr-krbo bade, mz nzmailz-krde leplz kcng trngiulrJiu mz nzvz-nqblq-krdr natq Gct. Murde batrpz Gct nzrlxngiti-krdr mz zmatq ngr Mqngrkxtr kc tqaelwapxpele mz nzryapwxtipx-krnge x mz nzale-krnge rkx x da kxznkctipxng. Dekc tqyapwxtipx-zpwxbo Nrpa ngr Kraes, abzo Jerusalem vz vz krlzbzle Provins kc Ilirikzm.

²⁰ Zvz drtwrnge pq mz nzpipx-krbo Nrpakxm-rlz mz lr mztea kcng trnzkrkzkalr Kraes. A' trsutiu drtwrnge nzalvztr-krnge lr mztea kcng tzxlrelr Nrpa ngr Kraes.

²¹ A' nzwz-krnge na-atutrle Nzryrngrkxtr kc tqycmnetr-ngrde Kraes mz nzrpi-krde kx, *“Leplz kcng trnzpi-kaipwzu badr nide, sa nakrlzlr nzalvztrngr angidr. X leplz kcng trnzxlr-kailru nrpa ngrde, nardr sa nayrplatrpz mz nrpa lc.”* ✧

²² X nzwrdde kqlupe kx rpi-ngrne kx naoklati-ngrbo nimu. A' nzale-krnge nzwzngnr lc rpwa'-ngmle bange.

Pol Aoti Drtwrde Nzoklati-krde Lr Rom Kxnzrlxngiting

²³ A' mzli ka nzwz-krnge yrkrpxpe mz mztea lcdeng, murde trpengr mrka me nayapwxtingr mou Nrpakxmrlz. Delc, tqaotipengr drtwrnge nzoklati-krbo nimu, murde yiz kqlupe kx sutingr drtwrnge nzvz-krbo bamu.

²⁴ Sa naoklatibo nimu mzli kc navz-ngrne Spen. X sa naodutr-lxblrku mz kzdung mzli. X mz

nibrde, suti drtwrnge naokatramu ninge mz nzvz-krnge Spen.

²⁵ A' mzli ka navz-kaix Jerusalem mz nzrtwz-krbo kzdung trau kx naokatrle lrmakxtr kx nzmncng elr.

²⁶ Murde dzbe lrmakxtr ngr provins kcng Masedonia x Akaia nzabrtz-ngrdr nzrkapx-krdr trau kx naokatrngr nra-nzlungr lrmakxtr kcng Jerusalem, mz nzodutr-lxblr-krdr badr.

²⁷ Eu. Nzabrtz-ngrdr nzrkapx-krdr, murde rblxbz mz kxtrngiulrJiu nzayzlu-krbzlr mz lr Jiu da kxnmrlzting amrlx kcng tqkabz Gct badr mz nzaxvctr-krbzlr mz Mevalu kc tqesalz-ngrbzle mz lr Jiu. Delc takitrde kxtrngiulrJiu nzrka-krbzlr kzdung dztudrng mz nrlc ka mz nzokatr-krdr lr Jiu.

²⁸ Mz nibr nzrtwz-krnge trau kcng tzatakqtilr Jerusalem, ninge kc tqvz-atex Spen. X mz nzvz-krnge lc Spen, dekc naoklati-ngrbo nimu.

²⁹ Krlzx kx mzli kc navz-ngrmc bamu, Kraes sa na-amrlz-zlwzle nigu mz da kxkqlu.

³⁰⁻³¹ Mzlengeng x inwengeng, nigu dzbede kxes' mz nzaxvctr-krbzku mz Kxetu rgu Jiszs Kxnmcpx, x mz nzaodukr Mqngrkxtr nigu. Mz nzmukrde lcde, drtwrgu naesz'ti kz mz nzkrka'-zvz-krngu ninge mz nzvz-krnge Jerusalem. Murde Gct na-arlapxle ninge mz provins kc Judiz, murde ma tzatrkatilr ninge lr Jiu kcng trnzlxn-gitilru Jiszs. X nakrka'-kz-ngrnamu kx leplz kxnztrng ne Gct kcng Jerusalem, na-abrtzlvzlr trau kc natwzbo badr.

³² Nzmu kx tqsutu drtwr Gct le, sa naelalz-ngrm drtwrnge nzvz-krbo bamu, x sa na-apqtrpamu

drtwrnge x na-amqngiamu nzrlxngiti-krnge mzli kc namnc-ngrgu.

³³ Krka'-ngrne kx Gct kc tqngi nou nzmnc-zpwxngr, namncbz bamu amrlx ngrmu. Eu, angida.

16

Rpibz Pol "Nimu la," Mz Kzdung Lr Rom

¹ Fibi kc tqrtwzbz letz lc bamu, nide inwegu kc tqwztrpz mz lrmakxtr kc mz taon Kenkrae, mz nzngini-krde kzdq kxaclevele dalr makxtr. Abrtzlvzx nide murde nide olvz kxmrlz-esz'ngr.

² Rlxtibo bamu nzaodu-krmu nide naesz' mz nzngini-krmu leplz neng Gct, murde wztrpz mz Kxetu. Okatramu nide mz nikeng suti drtwrde, murde okatr-zlwzle ninge x leplz kxnzkqlu.

³⁻⁴ Rpibzmu kx, "Nimu la," mz kztengeng amrlx mrla, myapxbz Prisila x Akwila, nidr kx wztrpzkr badr mz Jiszs Kxnzmcpix, badr lrmakxtr kcng tzangio-lxblrng ma nyzdr. Ycpwz pipz nzbz-krdr mz nzarlapx-krdr ninge. X nigr badr lrmakxtr amrlx kcng trngiulrJiu awitx-zlwz-ngrbzkcr mz Gct nidr.

⁵ X kztenge Epenetzs. Nide kx lxngiti-kaile Kraes mz provins kc Esia.

⁶ Mxri kc tqwz zlwz mz nzokatr-krde nimu.

⁷ Adronikzs x Junia, ni-kzdr lr Jiu. Mrlx lcng nzling mncpxmgr badr mz presin, x nidr aposol kxnzamatqng. Nidr rlilrdr kx nzlxngiti-kailr Kraes x ninge kc ate. *

* **16:7** Nzrpilr kx Junia ngi drtq olvz, kc tqngi kx aposol.

- 8 X Ampliatzs, nide mzlengge kx mrlzvxi mz Kxetu.
- 9 Urbanzs, nide ncblo kx wzku badr mz nrlarde nyz Kraes. X mrlx kztenge Stakis.
- 10 Apelis kc tqaelwapx-ngrde nzpqr nzlxnngiti-krde Kraes, mz nztu-amqngi-krde mz mzlir nzxpungr.
- X lr ma nyz Aristobulzs.
- 11 X Herodion, ni-kzde lr Jiu.
- X kxnzrlxngiting kcng tzmncng ma nyz Narsiszs.
- 12 Trifaena ncdr Trifosa, olvz kx nzwz-zlwzng mz nrlarde nyz Kxetu.
- X inwegu Persis kxnzmrlzti. Nide kzdq kz olvz kx wz kato mz nrlarde nyz Kxetu.
- 13 X Rufzs, ncblo kxmyapxbz, x lxede kz kc tqapusr-ngrde ninge mrlxde.
- 14 Asinkritzs, Flegon, Hermes, Patrobas, Hermas x lrmakxtr amrlx kcng tzangio-lxblrng badr.
- 15 X Filologzs, Julia, Olimpaz x Nerezs ncdr inwede, x leplz neng Gct amrlx kcng tzangio-lxblrng badr.
- 16 Eu, x rpi-etramu, "Nim la," x male-lxblramu mqmu mz nivz. Lrmakxtr amrlx kcng tzmncng mrka nzrpibzlr bamu kx, "Nimu la."

Natq Ngr Nzarl-lzbqngr

- 17 Mzlengeng x inwengeng, xplrmibz natqngge bamu, kx aclvetioamu leplz kcng tzakipxlr

kxnzrlxngiting. Murde nzatrkatilr nzrlxngiti-krmu mz nzrpi-krbzlr da kx blepxngr mz nzalvztrngr kc tqkrlz-kaiamu. Kapx-lzbxqamamu badr.

¹⁸ Murde leplz kxnzmulr lcng trnzvztrpwzung mz Kraes, Kxetu rgu. A' nzvz-nqblq-tpwzlr alwx kznikeng nzaoti drtwrdr kx namrlzbz badr. Nztamiti-krdr leplz mz natq x nzalvztr-krbzlr badr da kxmrlz mz nzxlr-ngrbz, a' nzkrzlr nzesabrtingr leplz kx trnzacvvetio-lzbxqung mz nzalvztr-rbr-krdr lc.

¹⁹ Leplz kxkqlu nzxlrpelr kx vz-nqblqpeamu Nrpakxmrlz. X mz nzmu-krde lcde, abrtztx-zlwz-ngrne nimu. A' suti drtwrnge nakrlz-angidramu da kxmrlz, x bzkq aoti drtwrmu da kxtrka.

²⁰ Murde ycpe pipz Gct kc tqngi nou nzmnc-zpwxngr, nzodati-krde zmatq ngr Setzn, mz nzokatr-krde nzaovxio-krmu leplz kcng tzipilr na-akipxlr nimu. Krka'-ngrne kx Kxetu rgu Jiszs Kxnzmcpx naokatr-zvzle nimu mz zmrlz ngrde kxmyalz. Eu, angida.

²¹ Kzdung lrmakxtr kcng mrka nzrpi-kzpzlr bamu, "Nimu la." Kzdung nidr seleng, Timoti kc tqwzkr ncdr. X Lusias, Jeszn x Sospata, mrlx lcng nigr badr lr Jiu.

²² X Tertizs kc tqyrbzle natqngc lcng.

²³ Gaizs kc tqmncr ncdr ma nyzde, x kc tqrlr-ngrbzle mz lrmakxtr nzangio-krdr mrka. X wai-kzle Erastzs kc tqacvele traungr taon ka, x

mzlegu Kwartzs. †

Nzrglqlzkr Pol Gct

25-26 Naglqlzku Gct kc tqkrlzle
Nzatu-amqngingr nimu amrlx
Mz nzlxngiti-krmu nrpa ngr
Jiszs Kxnmcpx kc tqyapwxtipxx.

Nrpakxmrlz lcde yc-kapq pnz
Mzli kc nrlc trnzwzka-ngrde.
A' mzli ka sc tqaelwapxpengr Gct
Kx suti drtwrde leplz amrlx.

Na-arlapxle kxnzlxngitilr Kraes,
Kxmule-esz' nidr lr Jiu o trtingr.
Gct kc tqllu zvz kapxle natq
Kx natqde kcng pnz na-atutrpeng.

Da kcng tzyro-pnzlr profet mz
Nzryrngrkxtr na-atutrng mzli ka.
Murde leplz mz nrlc tulvzo
Nalxngitilr Kraes mz nzmnc-krdr.

27 Gct nide txpwz Gct kxyrplapx.
X nigu kcng tzaxvctrpzng mz Kraes
Jiszs Kxnmcpx naglqlzku
Gct tqyc, tqyc. Eu, angida.

Delape. Ninge *Pol*.

† **16:23** Ngalrde kc 24 yclzm mz kzdung nzryrngr kcng pnz. X mule narsakrlrmi ngalrde kc 20, mz nzrpi-krde kx, "Eu, krka'-zvz-ngrne kx Kxetu rgu Jiszs Kxnmcpx naokatrle nimu amrlx ngrmu mz zmrlz ngrde kxmyalz. Eu, angida."

Nzryrngrkxtr Kc Ate Rut x Sam
The New Testament plus Ruth and Psalms is the
Natügu language of the Solomon Islands
Buk Baibel long langguis Natqgu

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

PDF generated using Haiola and XeLaTeX on 28 Dec 2024 from source files dated 31 Aug 2023

fb2b7f06-e254-5fb7-b59d-ee21d5d7a93f